

唐人劍俠傳

繪圖正續合訂




名 家 筆 記
劍 俠 傳
鄭 陶 齋 輯 編

1 9 3 6

上 海 中 央 書 店 印 行

民國廿五年二月出版

唐人劍俠傳 全一册 定價大洋一元八角



編	輯	者
鄭	陶	齋
校	訂	者
汪	漱	梅
鄭	逸	碧
印	行	者
中	央	書
中	央	書
店	店	店

總發行所 上海四馬路 中央書店

全國各大書局均有分銷

趙
處
女



劍俠傳 卷一

香山鄭官應陶齋校

趙處女

越王問范蠡手劍之術。蠡曰。臣聞趙有處女。國人稱之。願王問之。於是王乃請女。女將見王。道逢老人。自稱袁公。袁公問女曰。聞女善爲劍。願得一觀之。女曰。妾不敢有所隱也。惟公所試。公卽挽林杪之竹。似桔槔末折地。女接取其末。公操其本而刺女。女因舉杖擊之。公卽飛上樹。化爲白猿。

扶餘國王



扶餘國王

隋煬帝之幸江都也。命司空楊素守西京。素驕貴。又以時亂。天下之權重望崇者。莫我若也。奢貴自奉。禮異人臣。每公卿入言。賓客上謁。未嘗不踞牀而見。令美人捧出。侍婢羅列。頗僭於上。末年愈甚。無復知所負荷。有扶危持顛之心。一日。衛公李靖以布衣上謁。獻奇策。素亦踞見之。靖前揖曰。天下方亂。英雄競起。公爲帝室重臣。須以收羅豪傑爲心。不宜踞見賓客。素斂容而起。與語大悅。收其策而退。當靖之聘辦也。一妓有殊色。執紅拂立於前。獨目靖。靖旣去。而執拂者臨軒指問曰。去者處士第幾。住何處。吏具以對。妓領而去。靖歸逆旅。其夜五更初。忽聞叩門而聲低者。靖起問焉。乃紫衣帶帽人。杖揭一囊。靖問誰。曰。妾楊家之執拂妓也。靖遽延入。脫衣去帽。乃十八九佳麗人。

也。素面華衣而拜。靖驚答拜。曰妾侍楊司空久。閱天下之人多矣。無如公者。絲羅非獨生。願託喬木。故來奔耳。靖曰。楊司空權重京師。如何。曰。彼屍居餘氣。不足畏也。諸妓知其無成。去者衆矣。彼亦不甚逐。已計之詳矣。幸無疑焉。問其姓。曰張。問其伯仲之次。曰最長。觀其肌膚儀狀。言辭氣性。真天人也。靖不自意獲之。愈喜愈懼。瞬息萬慮不安。而窺戶者足無停履。既數日。聞追討之聲。意亦非峻。乃雄服乘馬排闥而去。將歸太原。行次靈石旅邸。既設牀鑪中。烹肉且熟。張氏以髮長委地。立梳牀前。靖方刷馬。忽有一人中形赤髻而虬。乘蹇驢而來。投革囊於爐前。取枕欹臥。看張梳頭。靖怒甚未決。猶刷馬。張熟視其面。一手握髮。一手映身搖示。令勿怒。急急梳頭畢。斂衽前。問其姓。臥客答曰。姓張。對曰。妾亦姓張。合是妹。遽拜之。曰第幾。曰第三。因問妹第幾。曰最長。遂喜曰。今多幸遇一妹。張氏遙呼曰。李郎且來見三兄。靖驟禮之。遂環

坐曰。煑者何肉。曰羊肉。計已熟矣。客曰。饑甚。靖出市胡餅。客抽腰匕首。切肉共食。食竟。餘肉亂切。送驢前食之。甚速。客曰。觀李郎之行。貧士也。何以致斯異人。曰。靖雖貧。亦有心者焉。他人見問。故不言。兄之問。則不隱耳。具言其由。曰。然則何之。曰。將避地太原。曰。然。故非君所致也。曰。有酒乎。曰。主人西則酒肆也。靖取酒一斗。既巡。客曰。吾有少下酒物。李郎能同之乎。曰。不敢。於是開革囊。取一人頭。并心肝。卻收頭囊中。以匕首切心肝共食之。曰。此人天下負心者。銜之十年。今始獲之。吾憾釋矣。又曰。觀李郎儀形器宇。真丈夫也。亦聞太原有異人乎。曰。嘗識一人。愚謂之真人也。其餘將帥而已。曰。何姓。曰。靖之同姓。曰。年幾。曰。僅二十。曰。今何爲。曰。州將之愛子也。曰。似矣。亦須見之。李郎能致吾一見否。曰。靖之友劉文靜者。與之狎。因文靜見之可也。然兄何爲。曰。望氣者言太原有奇氣。使吾訪之。李郎何日到太原。靖計之曰。某日當到。曰。

達之明日。日方曙。我於汾陽橋待耳。言訖。乘驢而去。其行若飛。回顧已失。靖與張氏且驚且喜。久之曰。烈士不欺人。固無畏。但促鞭而行。承期入太原。候之。果相見。大喜。偕詣劉氏。詐謂文靜曰。有善相者。思見郎君。請迎之。劉文靜素奇其人。方議論斥輔。一旦聞有客善相。其心可知。遽致酒延焉。既而太宗至。不衫不履。裼裘而來。神氣揚揚。貌與常異。虬髯默然居末座。見之心死。飲數杯起。招靖曰。真天子也。靖以告劉。劉益喜自負。既出而虬髯曰。吾見之十八九定矣。然須道兄見之。李郎宜與一妹復入京。某日午時。我於馬行東酒樓。樓下有此驢及瘦驢。卽我與道兄俱在其所矣。到卽登焉。又別。而靖與張氏復應之。及期訪焉。見二乘攬衣登樓。虬髯與一道士方對飲。見靖驚喜。召坐。同飲十數巡。曰。樓下櫃中有錢十萬。擇一深穩處。駐一妹。某日復會於汾陽橋。如期至。登樓。道士與虬髯已先坐矣。俱謁文靜。時方弈棋。起揖而語。少

焉。文靜飛書迎文皇看棋。道士對文靜弈。虬髯與靖傍立爲侍者。俄而文皇來。長揖就坐。神清氣朗。滿坐風生。顧盼偉如也。道士一見慘然。斂棋子曰。此局輸矣。輸矣。於此失卻。奇哉。救無路矣。復奚言。罷弈請去。既出。謂虬髯曰。此世界非公世界也。他方可勉圖之。勿以爲念。因共入京。虬髯路語靖曰。計李郎之程。某日方到。到之明日。可與一妹同詣某坊曲小宅。媿李郎往復相從。一妹懸然如磬。欲令新婦祇謁。略議從容。無令前卻。言畢。吁嗟而去。靖亦馳馬速征。俄卽到京。與張氏同往。至一小板門。扣之。有應者出拜曰。三郎令候李郎一娘子久矣。延入重門。門益壯麗。奴婢侍妾三十餘人。羅列於前。青衣二十人。引靖入東廳。廳之陳設。窮極珍異。巾箱妝奩冠鏡首飾之盛。非人間之物。巾櫛妝飾畢備。請更衣。衣又珍奇。既畢。傳云。三郎來。乃虬髯也。紗帽紫衫。趨走有龍虎之狀。相見歡然。命妻出拜。亦天人也。遂延中堂。陳設盤筵。

之盛。雖王公家亦不侔也。四人對坐陳饌。次出女樂二十人。旅奏於庭。似從天降。非人間之曲度。食畢行酒。有蒼頭自西堂舁出二十牀。各覆以錦帕。旣列。盡去其帕。乃文簿匙鑰之類。虬髯告靖曰。此皆珍寶貨帛之數。吾之所有。悉以充贈。何者。某本欲於此世界求事。或當龍戰二三年。建少功業。今旣有主。住亦何爲。太原李氏。真英主也。三五年內。卽當太平。李郎以英特之材。輔清平之主。竭心盡力。必極人臣。一妹以天人之姿。蘊不世之藝。從夫之貴。榮及軒裳。非一妹不能識李郎。非李郎不能遇一妹。聖賢起陸之漸。際會如期。虎嘯風生。龍騰雲合。固非偶然也。將予之贈。以佐真主。贊功業。勉之勉之。此後十餘年。東南數千里外有異事。是吾得意之秋也。一妹與李郎可瀝酒相賀。復因命家童列拜曰。李郎一妹。是汝主也。可善事之。言訖。與其妻戎服乘馬。一奴從後。數步遂不復見。靖據其宅。遂爲豪家。得以助文皇締纆之資。遂

匡大業。貞觀中。靖以左僕射平章事。適東南蠻奏曰。有海船千艘。甲兵數十萬。入扶餘國。殺其主自立。國已定矣。靖知虬髯成功也。歸告張氏。共瀝酒向東南拜而賀之。乃知真人之興。非英雄所冀。况非英雄者乎。人臣之謬思亂者。乃螳臂之拒走輪耳。或曰。衛公之兵法。半是虬髯所傳也。

嘉興繩技



嘉興繩技

唐開元年中。數敕賜州縣大酺。嘉興縣以百戲。與司監競勝精技。監官屬意尤切。所由直獄者。語於獄中云。儻若有諸戲劣於縣司。我輩必當厚責。然我等但能一事稍可觀者。卽獲財利。歎無能耳。乃各相問。至於弄瓦緣木之技。皆推求招引。獄中有一囚。笑謂所由曰。某有拙技。限在拘繫。不得略呈其事。吏驚曰。汝何所能。囚曰。吾解繩技。吏曰。必然。吾當爲爾言之。乃具以囚所能。白于監主。主召問罪輕重。吏云。此囚人所累。逋緡未納。餘無別事。官曰。繩技人常也。又何足異乎。囚曰。某所爲者。與人稍殊。官又問。曰如何。囚曰。衆人繩技。各繫兩頭。然後於其上。行立周旋。某只須一條繩。羸細如指。五十尺。不用繫着。拋向空中。騰躑翻覆。則無所不爲。官大驚悅。且令收錄。明日。吏領至戰

場。諸戲既作。喚此人令效繩技。遂捧一團繩。計百餘尺。置於諸地。將一頭手擲於空中。勁於筆。初拋二三丈。次四五丈。仰直如人牽之。衆大驚異。後乃拋繩虛空。高二十餘丈。仰空不見端緒。此人隨繩。手尋身。足離地。其勢如鳥。旁飛遠颺。望空而失。脫身狴犴。在此日焉。

劍俠傳 卷一 嘉興繩技

車中女子



車中女子

唐開元中。吳郡士人入京應明經。至京閒步曲坊。逢二少年。著大麻布衫。揖士人而過。色甚恭敬。然非舊識。士人謂誤識也。後數日。又逢之。二人謂曰。公到此境未爲主。今日方欲奉迓。邂逅相遇。實獲我心。揖請便行。士人雖甚疑怪。然強隨之。抵數坊。于東市一小曲內。有臨路店數間。相與直入。舍宇極整肅。二人攜引升堂。列筵甚盛。二人與客據繩牀對坐。更有數少年。各二十餘。禮亦謹。數數出門。若伺貴客。及午後。方云至矣。聞一車直門來。數少年擁後。直至堂前。乃一鈿車。捲簾見一女子。從車中出。年可十七八。容色甚佳。梳滿髻。衣則紈素。二人羅拜。女不答。士人拜之。女乃拜。遂揖客入。女乃升牀。當席而坐。揖二人及客。乃拜而坐。又有十餘後生。皆衣服輕新。各設拜。列坐于客

之下。陳以品味。饌至精潔。酒數巡。女子捧盃。顧謂二君奉談。今喜得展見。承有妙技。可得觀乎。士人遜謝曰。自幼至長。唯習儒經。絃管歌聲。實未曾學。女曰。所習非是也。君熟思之。先所能者何事。客又沈思良久曰。某爲學堂中。著靴於壁上。行得數步。自餘戲劇。則未爲之。女曰。然矣。請君試之。士乃起行於壁上。不數步而下。女曰。亦大難事。乃回顧坐中諸少年。各令呈技。俱起設拜。然後有於壁上行者。有手撮椽子行者。輕捷之戲。各呈數般。狀如飛鳥。此人拱手驚懼。不知所措。少頃。女子起辭出。士人驚恍不安。又數日。途中復見二人。曰。欲假駿騎可乎。士人許之。至明日。聞宮苑中失物。掩捕失賊。唯收得馬。是將馱物者。驗問馬主。遂收士人入內侍省。勘問。驅入小門。吏自後推之。倒落深坑數丈。仰望屋頂七八丈。唯見一孔。纔見尺餘。自旦至食時。見繩垂一器。食下。士人餒。急取食之。食畢。繩乃引去。深夜忿甚。悲惋之極。仰望忽見一

物。如鳥飛下。覺至身邊。乃人也。以手撫士曰。計甚驚怕。然某在無慮也。聽其聲。則向所遇女子也。云共君出矣。以絹重縛士人胸臆。訖。以絹頭繫女身。女聳身騰上。飛出宮城。去門數十里乃下。云君且歸江淮。求仕之計。望伺他日。士人幸脫大獄。乞食而歸。後竟不敢求名西上矣。

僧俠



僧俠

唐建中初。士人韋氏移家汝州。中路逢一僧。因與連鑣。言論頗洽。日將夕。僧指路岐曰。此數里。是貧道蘭若。郎君能重顧乎。士人許之。因令家口先行。僧卽處分從者。供帳具食。行十餘里不至。韋生問之。卽指一處林煙曰。此是矣。及至。又前進。時已昏夜。韋生疑之。素善彈。乃密於靴中取弓啣彈。懷銅九十餘。方責僧曰。弟子有程期。適偶貧上人清論。勉副相邀。今已行二十里。不至何也。僧但言且行是。僧前行百餘步。韋生知其盜也。乃彈彈僧。正中其腦。僧初若不覺。凡五發中之。僧始捫中庭。徐曰。郎君莫惡作劇。韋駭之。知無可奈何。亦不復彈。良久至一莊墅。數十人列火炬出迎僧。延韋生坐一廳中。笑曰。郎君勿憂。因問左右。夫人下處如法無。復曰。郎君且自慰安之。卽就此也。韋

生見妻女別在一處。供帳甚盛。相顧涕泣。卽就僧。僧前掣韋生手曰。貧道盜也。本無好意。不知郎君藝若此。非貧道亦不支也。今日固無他。幸不疑耳。適來貧道所中郎君彈。悉在。乃舉手搗腦後五丸墜焉。有頃布筵具蒸犢。犢上割刀子十餘。於齋餅環之。揖韋生就坐。復曰。貧道有義弟數人。欲令謁見。言已。朱衣巨帶者五六輩。列於階下。僧叱曰。拜郎君。汝等向遇郎君。則成齋粉也。食畢。僧曰。貧道久爲此業。今向遲暮。欲改前非。不幸有一子。技過老僧。欲請郎君爲老僧斷之。乃呼飛飛出參郎君。飛飛年纔十六七。碧衣長袖。皮肉如臘。僧曰。向後堂待郎君。僧仍授韋一劍及五丸。且曰。乞郎君盡藝殺之。無爲老僧累也。引韋入一堂中。乃反鎖之。堂中四隅。明燈而俟。飛飛當堂執一短鞭。韋引彈。意必中。丸已敲落。不覺躍在梁上。循壁虛躡。捷若猿猱。彈丸盡不復中。韋乃運劍逐之。飛飛倏忽逗閃。去韋身不尺。韋斷其鞭數節。竟不能

傷。僧久乃開門。問韋。與老僧除得害乎。韋具言之。僧悵然顧飛。飛曰。郎君證成汝爲賊也。知復如何。僧終夜與韋論劍及弧矢之事。天將曉。僧送韋路口。贈絹百疋。垂泣而別。

西京店老人



西京店老人

唐韋行規自言少時遊京西。暮止店中。更欲前進。店有老人方工作。謂曰。客勿夜行。此中多盜。韋曰。某留心弧矢。無所患也。因行數十里。天黑。有人起草中尾之。韋叱不應。連發矢中之。復不起。矢盡。韋懼奔焉。有頃。風雷總至。韋下馬。負一大樹。見空中有電光相逐。如鞦韆勢。漸逼樹杪。覺物紛紛墜其前。韋視之。乃木札也。須臾積札埋至膝。韋驚懼。投弓矢仰空中乞命。拜數十。電光漸高而滅。風雷亦息。韋顧大樹。枝幹盡矣。鞍馱已失。遂返前店。見老人方籬桶。韋意其異人也。拜而且謝。老人笑曰。客勿恃弓矢。須知劍術。引韋入後院。指鞍馱。言卻領取。聊相試耳。又出桶板一片。昨夜之箭。悉中其上。韋請役力承事。不許。微露擊劍事。韋亦得一二焉。

蘭陵老人




蘭陵老人

唐黎幹爲京兆尹時。曲江塗龍祈雨。觀者數十。黎至。獨有老人植杖不避。幹怒杖之。如擊鞦韆。掉臂而去。黎疑其非常人。命坊老卒尋之。至蘭陸里之南。入小門。大言曰。我困辱甚。可具湯也。地坊卒遽返白黎。黎大懼。因衣壞服。與坊卒至其處。時已昏黑。坊卒直入。通黎之官闕。黎唯而趨入。拜伏曰。向迷丈人物色。罪當十死。老人驚曰。誰引尹來此。卽牽上階。黎知可以理奪。徐曰。某爲京尹。尹威稍損。則失官政。丈人埋形雜迹。非證慧眼。不能知也。若以此罪人。是釣人以名。則非義士之心也。老人笑曰。老夫過也。乃具酒設席於地。招坊卒令坐。夜深。語及養生。言約理辨。黎轉敬懼。因曰。老夫有一技。請爲尹設。遂入。良久。紫衣朱囊。盛長劍七口。舞於中庭。迭躍揮霍。挽光電激。或橫若掣。

帛。旋若燼火。有短劍二尺餘。時時及黎之衽。黎叩頸股慄。食頃。擲劍於地。如北斗狀。顧謂黎曰。向試尹膽氣。黎拜曰。今日已後性命。丈人所賜。乞役左右。老人曰。尹骨相無道氣。非可遽授。別日更相顧也。揖黎而入。黎歸氣色如病。臨鏡方覺鬚荊落寸餘。翌日復往。室已空矣。

劍俠傳 卷一 蘭陵老人

盧生



劍俠傳 卷二

香山鄭官應陶齋校

盧生

唐元和中。江淮有唐山人者。涉獵史傳。好道。常居名山。自言善縮錫。頗有師之者。後于楚州逆旅。遇一盧生。意氣相合。盧亦語及鑪火。稱唐族乃外氏。遂呼唐爲舅。唐不能相捨。因邀同之南嶽。盧亦言親故在陽羨。將訪之。今且貪舅山林之程也。中途止一蘭若。夜半。語笑方酣。盧曰。知舅善縮錫。可以梗概論之。唐笑曰。某數十年重跡從師。祇得此術。豈可輕道耶。盧復祈之不已。唐辭以師授有時日。可至嶽中相傳。盧因作色曰。舅今須傳。勿等閑也。唐責之曰。某與公風馬牛耳。邂逅相遇。實慕君子。何至騶卒不若也。盧攘臂瞋目。盼

之良久曰。我俠客也。如不得術。舅將死於此。因懷中探烏革囊。出七首。形如偃月。執火前熨斗。削之如泥。唐恐懼具述。盧笑曰。幾誤殺舅。此術十得五六。方謝曰。某師仙也。令某等十人。索天下妄傳黃白術者殺之。至添金縮錫。傳者亦死。某久得乘躡之道者。因拱揖唐。忽失所在。自後遇道流。常陳此事以戒之。

劍俠傳 卷二 盧生

聶隱娘



聶隱娘

聶隱娘者。唐貞元中魏博大將聶鋒之女也。年方十歲。有尼乞食於鋒舍。見隱娘悅之。乃云。問押衙乞取此女。鋒大怒叱尼。尼曰。任押衙鐵櫃中盛。亦須偷去矣。及夜。果失隱娘所在。鋒大驚駭。令人搜尋。曾無形響。父母每思之。相對涕泣而已。後五年。尼送隱娘歸。告鋒曰。教已成矣。可自領取。尼歛亦不見。一家悲喜。問其所習。曰。初但讀經念咒。餘無他也。鋒不信。懇詰。隱娘曰。真說又恐不信如何。鋒曰。但真說之。乃曰。隱娘初被尼挈去。不知行幾里。及明。至大石穴中。嵌空數十步。寂無居人。猿猱極多。松蘿益邃。已有二女。亦各十歲。皆聰明婉麗。不食。能於峭壁上飛走。若捷猱登木。無有蹶失。尼與我藥一粒。兼令長執寶劍一口。長二尺許。鋒利吹毛可斷。遂令二女教其攀緣。漸覺身

輕如風。一年後。刺猿獠百無一失。後刺虎豹。皆決其首而歸。三年後能飛。使刺鷹隼。無不中。劍之刃漸減五寸。飛走遇之。不知其來也。至四年。留二女守穴。挈我於都市。不知何處也。指其人者。一一數其過曰。爲我刺其首來。無使知覺。定其膽。若飛鳥之容易也。受以羊角匕首。刃廣三寸。遂白日刺其人於都市。人莫能見。其首入囊返命。以藥化之爲水。五年又曰。某大僚有罪。無故害人若干。夜可入其室。決其首來。又攜匕首入室。度其門隙。無有障礙。伏之梁上。至暝時。得其首而歸。尼大怒曰。何太晚如是。某云。見前人戲弄一兒。可愛。未忍便下手。尼叱曰。已後遇此輩。先斷其所愛。然後決之。某拜謝。尼曰。吾爲汝開腦後。藏匕首而無所傷。用卽抽之。曰。汝術已成。可歸家。遂送還。云後二十年。方可一見。鋒聞語甚懼。後遇夜卽失蹤。及明而返。鋒已不敢詰之。因茲亦不甚憐愛。忽值磨鏡少年及門。女曰。此人可與我爲夫。白父。父不敢不

從。遂嫁之。其夫但能淬鏡。餘無他能。父乃給衣食甚豐。外室而居。數年後。父卒。魏帥稍知其異。遂以金帛召署爲左右吏。如此又數年。至元和間。魏帥與陳許節度使劉昌裔不協。使隱娘賊其首。隱娘辭帥之許。許帥能神算。已知其來。召牙將令來曰。早至城北。候一丈夫。一女子。名跨白黑衛至門。遇有鵲前噪。丈夫以弓彈之不中。妻奪夫彈。一丸而斃鵲者。揖之云。吾欲相見。故遠相祇迎也。衙將受約束。遇之。隱娘夫妻曰。劉僕射真神人。不然者。何以洞吾也。願見劉公。劉勞之。隱娘夫妻拜曰。得罪僕射。合萬死。劉曰。不然。各親其主人之常事。魏今與許何異。願請留此。勿相疑也。隱娘謝曰。僕射左右無人。願舍彼而就此。服公神明也。蓋知魏帥之不及劉。劉問其所須。曰。每日只要錢二百文足矣。乃依所請。忽不見二衛所之。劉使人尋之。不知所向。後潛於布囊中。見二紙衛。一黑一白。後月餘。白劉曰。彼未知信。必使人繼至。今宵請翦

髮繫之以紅綃。送于魏帥枕前。以表不回。劉聽之。至四更。卻返曰。送其信了。後夜必使精精兒來。殺某及賊。僕射之首。此時亦萬計殺之。乞不憂耳。劉豁達大度。亦無畏色。是夜明燭半宵之後。果有二幡子。一紅一白。飄飄然如相擊於牀四隅。良久。見一人自空而踣。身首異處。隱娘亦出曰。精精兒已斃。拽出于堂之下。以藥化爲水。毛髮不存矣。隱娘曰。後夜當使妙手空空兒繼至。空空兒之神術。人莫能窺其用。鬼莫得躡其蹤。能從空虛入冥莫。無形而滅影。隱娘之藝。故不能造其境。此卽繫僕射之福耳。但以于闐玉周其頸。擁以衾。隱娘當化爲蠶蝶。潛入僕射腸中。聽伺其餘無逃避處。劉如言。至三更。瞑目未熟。果聞項上鏗然聲甚厲。隱娘自劉口中躍出。賀曰。僕射無患矣。此人如俊鷲。一搏不中。卽翩然遠逝。恥其不中耳。纔未逾一更。已千里矣。後視其玉。果有七首割處。痕逾數分。自此劉轉厚禮之。自元和八年。劉自許入覲。隱

娘不願從焉。云自此尋山水。訪至人。但乞一廬。給與其夫。劉如約。後漸不知所之。及劉薨于統軍。隱娘亦鞭驢而一至京師。柩前慟哭而去。開成年。昌裔子縱除陵州刺史。至蜀棧道。遇隱娘。貌若當時。甚喜相見。依前跨白衛如故。謂縱曰。郎君大災。不合適此。出藥一粒。令縱吞之。云來年火急。拋官歸洛。方脫此禍。吾藥力只保一年患耳。縱亦不甚信。遺其繒綵。隱娘一無所受。但沈醉而去。後一年。縱不休官。果卒于陵州。自此無復有人見隱娘。

荆十三娘



荆十三娘

唐進士趙中立。家于溫州。以豪俠爲事。至蘇州旅舍。支山禪院僧房。有一女。商荆十三娘。爲夫亡。設大祥齋。因慕趙。同載歸揚州。趙以氣義耗荆娘之財。殊不介意。其友人李正郎弟三十九。有愛妓。妓之父母。奪以與諸葛殷。李悵恨不已。時諸葛與吕用之。幻惑太尉高駢。恣行威福。李懼禍。飲泣而已。偶話於荆娘。荆娘亦爲之憤惋。謂李三十九郎曰。此小事。我能爲郎取之。但請過江於潤州北固山。六月六日正午時待我。李並依之。至期。荆娘以囊盛妓。兼致妓之父母。首歸于李。復與趙同入浙中。不知所終。

紅
線



劍俠傳 卷二 紅線

四一

紅線

唐潞州節度使薛嵩家青衣紅線者。善彈阮咸。又通經史。嵩召俾其掌牋表。號曰內記室。時軍中大宴。紅線謂嵩曰。羯鼓之聲。頗甚悲切。其擊者必有事也。嵩素曉音律。曰如汝所言。乃召而問之。云某妻昨夜身亡。不敢求假。嵩卽遣歸。是時至德之後。兩河未寧。以塗陽爲鎮。命嵩固守。控壓山東。殺傷之餘。軍府草創。朝廷命嵩女嫁魏博節度使田承嗣男。又遣嵩男娶滑毫節度使令狐章女。三鎮交爲媼姪。使日浹往來。而田承嗣常患肺氣。遇暑益增劇。每曰。我若移鎮山東。納其涼冷。可以延數年之命。乃募軍中武勇十倍者。得三千人。號外宅男。而厚其卹養。常令三百人夜直州宅。卜良日將併潞州。嵩聞之。日夕憂悶。咄咄自語。計無所出。時夜漏方深。轅門已閉。策杖庭際。唯紅線

從焉。紅線曰。主公一月不遑寢食。意有所屬。豈非鄰境乎。嵩曰。事繫安危。非汝所能料。紅線曰。某誠賤品。亦能解主憂者。嵩聞此語異。乃曰。我不知汝是異人。誠暗昧也。遂具告其事。曰。我承祖父遺業。受國家厚恩。一旦失其疆土。卽數百年功勛盡矣。紅線曰。此易與耳。不足勞主憂焉。某暫一到魏境。觀其形勢。覘其有無。今一更首途。二更可以復命。請先定一走馬使。具寒暄書。其他則待某卻回也。嵩曰。倘事或不濟。反速之禍。又如之何。紅線曰。某之此行。無不濟也。乃入闈房。歸其行具。梳烏鬢髻。插金鳳釵。衣紫繡短袍。著青絲輕履。胸前挂龍紋七首額。上書太乙神名。再拜而行。倏忽不見。嵩乃返身閉戶。背燭危坐。常時飲酒。不過數合。是夕舉觴十餘不醉。忽聞曉角吟風。一葉墜露。驚而起。問。卽紅線迴矣。嵩喜而慰勞。詢事諧否。紅線對曰。幸不辱命。又問曰。無殺傷否。曰。不至是。但取牀頭金合爲信耳。又曰。某子夜前三刻。卽達魏

城。凡歷數門。遂及寢所。聞外宅兒止於房廊。睡聲雷動。見中軍士卒步於庭下。傳叫風生。乃發其左扉。抵其寢帳。田親家翁止於帳內。鼓跌酣眠。頭枕文犀。髻包黃縠。枕前露一七星劍。劍前仰開一金合。內書生身甲子。與北斗神名。復以名香美珠。壓鎮其上。然則揚威玉帳。坦其心。豁於生前。熟寢蘭堂。不覺命懸於手下。寧勞擒縱。只益傷嗟。時則蠟炬煙微。爐香燼委。侍人四布。兵仗森羅。或頭觸屏風。斲而禪者。或手持巾拂。寢而伸者。某乃拔其簪珥。塞其裳衣。如病如醒。皆不能寤。遂持金合以歸。出魏城西門。將行三百里。見銅臺高揭。漳水東流。晨鐘動野。斜月在林。忿往喜還。頓忘於行役。感知酬德。聊副於咨謀。夜漏之時。往返七百里。入危邦。一道經過五六城。冀滅主憂。敢言勞苦。嵩乃發使入魏。遺承嗣書曰。昨來暮夜有客。自魏中來。云從元帥牀頭。獲一金合。不敢留駐。謹卻封納。專使星馳。夜半方達。正見搜捕金合。一軍憂疑。

使者以馬捶搗門。非時請見。承嗣遽出。使者以金合授之。捧承之時。驚惶絕倒。遂留使者。止於宅中。狎以私宴。多其賜賚。明日。遣使齎帛三萬疋。名馬二百疋。及珍異等。以獻於嵩。曰。某之首領。繫在恩私。便宜知過自新。不復更貽伊戚。專膺指使。敢議親姻。彼當捧鼓後車。來在麾鞭前馬。所置紀綱。外宅兒者。本防他盜。亦非異圖。今並脫其甲裳。放歸田畝矣。由是一兩箇月內。河北河南。信使交至。忽一日。紅線辭去。嵩曰。汝生我家。今欲安往。又方賴汝力。豈可議行。紅線曰。某前生本男子。游學江湖間。讀神農藥書。而救世人災患。時里有孕婦。忽患蠱癘。某誤以荒花酒下之。婦人與腹中二子俱斃。是某一舉。殺其三人。陰律見誅。罰爲女子。使身居賤隸。氣稟凡俚。幸生於公家。今十九年矣。身厭綺羅。口窮甘鮮。寵待有加。榮亦甚矣。况國家建極。慶且無疆。此卽違天。理當盡弭。昨至魏邦。以是報恩。今兩地保其城池。萬人保其性命。使亂

臣知懼。列土謀安。在某一婦人。功亦不小。固可贖其前罪。還其本形。便當遁跡塵中。棲心物外。澄清一氣。生死長存。嵩曰。不然。以千金爲居山之所。紅線曰。事關來世。安可預謀。嵩知不可留。乃廣爲餞別。悉集賓僚。夜宴中堂。嵩以歌送紅線酒。請座客冷朝陽爲詞。詞曰。采菱歌怨木蘭舟。送客魂消百尺樓。還是洛妃乘霧去。碧天無際水空流。歌竟。嵩不勝其悲。紅線拜且泣。因僞醉離席。遂亡所在。

王敬弘僕



王敬宏僕

唐文宗皇帝嘗寶白玉枕。德宗朝于闐國所貢。雕琢奇巧。蓋希代之寶。置寢殿帳中。一旦忽失所在。禁衛清密。然非恩渥嬪御。莫有至者。珍玩羅列。他無所失。上驚駭。移時下詔於都城索賊。密謂樞近。及左右廣中尉曰。此非外寇所入。盜當在禁掖。苟求之。不獲且虞他變。一枕固不足惜。卿等衛我皇宮。必使罪人斯得。不然。天子環衛。自茲無用矣。內宮惶慄伏罪。請以浹旬求捕。大懸金帛購之。略無尋究之迹。聖旨嚴切。校繫者漸多。坊曲閭里。靡不搜捕。有龍武二蕃將王敬弘常蓄小僕。年甫十八九。神彩俊利。使之無往不屈。敬弘與流輩於威遠軍會宴。有侍妓善鼓胡聲。四座酒醉。因請度曲。辭以樂器非妙。須常御者彈之。鐘漏已傳。求之不及。因起解帶。小僕曰。若要琵琶。頃刻可

至。敬弘曰。禁鼓纔動。軍門已鎖。尋常汝豈不見。何言之謬也。既而就飲數巡。小僕以繡囊將琵琶而至。坐客歡笑。南軍去左廣。往復三十餘里。入夜且無行旅。既而倏忽往來。敬弘驚異。如失時。又失枕。搜捕嚴急。意以盜竊疑之。寔罷及明。遽歸其第。引而問之曰。使汝累年。不知躡捷如此。我聞世有俠士。汝莫是否。小僕謝曰。非有此事。但能行耳。因言父母皆在蜀川。頻年偶至京國。今欲卻歸鄉里。有一事欲報恩。偷枕者早知姓名。三數日當令伏罪。敬弘曰。如此事。卽非等閒。遂令全活者不少。未知賊在何許。可報司存掩獲否。小僕曰。偷枕者。曰。彭郎也。市廛軍伍。行止不恆。勇力過人。且善超越。苟非便折其足。雖千兵萬騎。亦將奔走。自茲再宿。候之於望仙門。伺便擒之。必矣。將軍隨某觀之。此事仍須秘密。是時涉旬無雨。向晚。埃塵頗甚。車馬騰踐。跬步間。人不相覩。彭郎與少年數輩。連臂將入軍門。小僕執毬杖擊之。歟然已折左足。

仰而窺曰。我偷枕來。不怕他人。唯懼於爾。既此相值。豈復多言。於是鼻至左。右軍一歎而伏。上喜得賊。又知獲在禁旅。引彭郎臨軒詰問。具陳常在宮內往來。上曰。此乃任俠之流。蓋非常之竊盜。內外囚繫數百人。於是悉令原之。小僕初得彭郎。已告敬弘歸蜀。尋之不可。但賞敬弘而已。

崑崙奴



劍俠傳

卷三

香山鄭官應陶齋校

崑崙奴

唐大歷中有崔生者。其父爲顯僚。與蓋天之勳臣一品者熟。生是時爲千牛。其父使往省一品疾。生少年容貌如玉。性稟孤介。舉止安詳。發言清雅。一品命妓軸簾召生入室。生拜傳父母命。一品忻然慕愛。命坐與語。時三妓人豔皆絕代。居前以金甌貯緋桃而擘之。沃以甘酪而進。一品遂命衣紅綃妓者。擎一甌與生食。生少年赧妓輩。終不食。一品命紅綃妓以匙而進之。生不得已而食。妓哂之。遂告辭而去。一品曰。郎君閒暇。必須一相訪。無間老夫也。命紅綃送出院時。生回顧。妓立三指。又反掌者三。然後指胸前小鏡子云。記取。

餘更無言。生歸。達一品意。返學院。神迷意奪。語減容沮。恍然凝思。日不暇食。但吟詩曰。誤到蓬山頂上遊。明璫玉女動星眸。朱扉半掩深宮月。應照瓊芝雪豔愁。左右莫能究其意。時家中有崑崙奴磨勒。顧瞻郎君曰。心中有何事。如此抱恨不已。何不報老奴。生曰。汝輩何知。而問我襟懷間事。磨勒曰。但言當爲郎君釋解。遠近胥能成之。生駭其言異。遂具告之。磨勒曰。此小事耳。何不早言之。而自苦耶。生又白其隱語。勒曰。有何難會。立三指者。一品宅中有十院歌姬。此乃第三院耳。反掌三者。數十五。指以應十五日之數。胸前小鏡子。十五夜月圓如鏡。令郎君來耳。生大喜不自勝。謂磨勒曰。何計而能達我鬱結。磨勒笑曰。後夜爲十五夜。請深青絹兩疋。爲郎君製束身之衣。一品宅有猛犬。守歌妓院門外。常人不得輒入。入必噬殺之。其警如神。其猛如虎。卽曹州孟海之犬也。世間非老奴不能斃此犬耳。今夕當爲郎君搗殺之。遂乃

犒以酒肉。至三更。攜鍊錐而往。食頃而回曰。犬已斃矣。固無障塞耳。是夜三更。與生衣青衣。遂負而逾十重垣。躍入歌妓院內。止第三門。繡戶不扃。金缸微明。惟聞妓長歎而坐。若有所伺。翠環初墜。蓮臉纔舒。幽恨方深。殊愁轉結。但吟詩曰。深洞鶯啼恨阮郎。偷來花下解珠囊。碧雲飄斷音書絕。空倚玉簫愁鳳凰。侍衛皆寢。鄰近聞然。生遂緩褰簾而入。姬良久驗是生。乃躍下榻。執生手曰。知郎君穎悟。必能默識。所以手語耳。又不知郎君有何神術。而能至此。生具告磨勒之謀。負荷而至。姬曰。磨勒何在。曰。簾外耳。遂召入。以金甌酌酒而飲之。姬白生曰。某家本富。居在朔方。主人擁旄。逼爲姬僕。不能自死。尙且偷生。臉雖鉛華。心頗鬱結。縱玉筯舉饌。金鑪泛香。雲屏而每近綺羅。繡被而常眠珠翠。皆非所願。如在桎梏。賢爪牙既有神術。何妨爲脫狴牢。所願旣伸。雖死不悔。請爲僕隸。願侍光容。又不知郎君高意如何。生愀然不語。磨勒

曰。娘子既堅確如是。此亦小事耳。姬甚喜。磨勒請先爲姬負其囊橐妝奩。如此三復焉。然後曰。恐遲明。遂負生與姬而飛出峻垣十餘重。一品家之守禦。無有警者。遂歸學院而匿之。及旦。一品家方覺。又見犬已斃。一品大駭曰。我家門垣。從來邃密。扃鑰甚嚴。勢似飛騰。寂無形跡。此必是一大俠矣。無更聲聞。徒爲患禍耳。姬隱崔生家二歲。因花時。駕小車而遊曲江。爲一品家人潛誌認。遂白一品。一品異之。召崔生而詰之事。懼而不敢隱。遂細言端由。皆因奴磨勒負荷而去。一品曰。是姬大罪過。但郎君驅使踰年。卽不能問是非。某須爲天下人除害。命甲士五十人。嚴持兵仗。圍崔生院。使擒磨勒。遂持匕首。飛出高垣。瞥若翅翎。疾同鷹隼。攢矢如雨。莫能中之。頃刻之間。不知所向。然崔家大驚愕。後一品悔懼。每夕多以家童持劍戟自衛。如此周歲方止。後十餘年。崔家有人見磨勒賣藥於洛陽市。容髮如舊耳。

頭陀僧




頭陀僧

蜀許寂。少年棲四明山。學易於晉徵君。一日有夫婦同詣山居。攜一壺酒。寂詰之。云今日離剡縣。寂曰。道路甚遙。安得一日及此。頗有異之。然夫甚少。而婦顏色過之。狀貌毅然而寡默。其夕以壺觴酌許。此丈夫出一拍板。徧以銅釘釘之。乃抗聲高歌。悉是說劍之意。俄自臂間抽出二物。展而喝之。卽二口劍也。躍起。在寂頭上盤旋交擊。寂甚驚駭。尋而收匣之。飲畢就寢。及旦乃空榻也。至日中。復有一頭陀僧來尋此夫婦。寂具道之。僧曰。我亦其人也。道士能學之乎。（時寂按道服也。）寂辭曰。少尙玄教。不願爲此。其僧傲然而笑。乃取寂淨巾拭脚。徘徊已不見矣。後再於華陽遇之。始知其儒也。杜光庭自京入蜀。宿於梓潼廳。一僧後至。縣宰周樂與之有舊。乃云。今日自興元來。杜

異之。明發。僧遂前去。宰曰。此僧乃鹿蘆躋。亦俠之流也。詩僧齊已於瀉山林下。親遇一僧。於頭指甲下抽出二劍。跳躍凌空而去。

劍俠傳 卷三 頭陀僧

丁秀才



劍俠傳 卷三 丁秀才

丁秀才

郎州道士羅少微。頃在茅山紫陽觀寄泊。有丁秀才者。亦同寓於觀中。舉動風味。不異常人。然不汲汲於進取。盤桓數年。遇冬夕霰雪方甚。二三道士圍爐。有脆羝美醞之羨。丁曰。致之何難。時以爲戲言。俄見開戶奮袂而去。少頃蒙雪而回。提一銀榼酒。熟羊一足。云浙帥廚中物。因是驚訝歡笑。擲劍而舞。騰躍而去。不知所往。唯銀榼存焉。院主以狀聞於縣官。詩僧貫休俠客詩曰。黃昏風雨黑如磬。別我不知何處去。得非江淮間曾聆此事而構思也。

初鉞女子



紉絨女子

京國豪士潘將軍。住光德坊。(忘其名。衆爲潘鷲碑也。)本家襄漢間。常乘舟射利。因泊江壩。有僧乞食。留止累日。盡心檀施。僧歸去。謂潘曰。觀爾形質器度。與衆賈不同。至於妻孥。皆享厚福。因以玉念珠一串留贈曰。寶之。不但聚財也。後亦有官祿。旣而遷貿數年。遂鏹均陶鄭。其後職居左廣。列第於京師。常寶念珠。貯之以綉囊。玉盒。置道場內。每月朔。則出而拜之。一旦開盒。啓囊。已亡珠矣。然而絨封若舊。他物亦無所失。於是奪魄喪精。以爲其家將破之兆。有主藏者。常識京兆府停解所由王超。年且八十。因密語其事。超曰。異者。此非攘竊之盜也。某試尋之。未知固得否。超他日曾過勝業坊北街。時春雨初霽。有三鬢女子。可年十七八。衣裝襍禮。著木履於道側槐樹下。值軍中

少年蹴踘。接而送之。直高數丈。於是觀者漸衆。超獨異之。而止於勝業坊北門。短曲有母同居。蓋以紉針爲業。超因以他事熟之。遂爲甥舅。居室甚貧。與母同臥土榻。烟爨或不動者。往往經於累日。或設殺養。時有水陸珍異。吳中初進洞庭橋。恩賜宰臣外。京輦未有此物。密以二枚贈超云。有人於內中將出。而稟性剛決。意甚疑之。如此往來周歲矣。超一旦攜食與之。從容徐謂曰。舅有深誠。欲告外甥。未知何如。因曰。每感重恩。恨無所答。若力可施。必能赴蹈湯火。超曰。潘將軍失卻念珠。不知知否。微笑曰。從何知之。超揣其意。不甚藏密。又曰。外甥但可尋覓。厚備贖繇。酬贈。女子曰。勿言於人。某偶與朋儕爲戲。終卻送還。因循未暇。舅來日詰旦。於慈恩寺塔院相候。某知有人寄珠在此。超如期而往。頃刻至矣。時寺門始開。塔戶猶鎖。謂超曰。少頃仰觀塔上。當有所見。語訖而走。疾若飛鳥。忽於相輪上舉手示超。歛然攜念珠而下。曰。便

可將還。勿以財帛爲意。超送詣潘。具述其旨。因以金玉繒帛。密爲之贈。明日訪之。已空室矣。馮絨給事嘗聞京師多任俠之徒。及爲尹。密詢左右。引超具述其語。將軍所說。與超符同。

宣慈寺門子




宣慈寺門子

宣慈寺門子。不記姓氏。酌其人。任俠徒也。唐乾符二年。韋昭範登弘詞科。昭範乃度支使楊巖懿親。及宴席。嚮幕器皿之類。假於計司嚴復。遣以使庫。供借。其年三月。晏於曲江亭子。供帳之盛。罕有其比。時進士同日有宴。都人觀者甚衆。飲興方酣。俄覩一少年。跨驢而至。驕悖之狀。旁若無人。於是俯筵席。張目引頸。復以巨筓振桌。佐酒。謔浪之詞。所不能聽。諸子駭愕之際。忽有于衆中。批其頰者。隨手而墮。於是連加毆擊。又奪所執筓。筓之百餘。衆皆致怒。瓦礫亂下。殆將斃矣。當此之際。紫雲樓門。軋然而開。有紫衣從人。數輩馳告曰。莫打。傳呼之聲相續。又一中貴。驅殿甚盛。馳馬來救。復操筓迎擊。中者無不面仆於地。敕使亦爲所擊。皆奔馬而返。與從人俱入。門亦隨閉。座內甚

忻愧。然不測其來。又慮事連宮禁。禍不旋踵。乃以緡錢束素。召行殿者。徐詰之曰。爾何人。與諸郎君阿誰有素。而能相爲如此。對曰。某是宣慈門子。亦與諸郎君無識。第不平此人無禮耳。衆皆嘉歎。悉以錢帛遺之。復相謂曰。此人必然亡去。不然當爲殺之。後旬朔。座中之客多有假途宣慈寺門者。門子皆能識之。莫不加敬焉。

劍俠傳 卷三 宣慈寺門子

李龜壽



李龜壽

唐晉公王鐸。僖宗朝。再入相。不協於權道。唯公心以宰天下。故四方有所請。礙於行者。必固爭不允。由是藩鎮忌焉。而志尙墳典。雖門施行馬。庭列鳧鍾。而尋繹未嘗倦。於永寧里第別築書齋。每朝退獨處其中。忻忻如也。一日將入齋。唯所愛卑脚犬花鵲相從。既啓扉。而犬速吠。啣公衣卻行之。不解。既入。花鵲仰視鳴噪亦急。公疑之。乃於匣中拔千金劍。按于膝上。仰空祝曰。若有異物。可出相見。吾乃丈夫。豈脅于鼠輩而相逼耶。言訖。歛有一物。自梁而墮地。乃人也。朱髮衣短皂衣。色貌黔瘦。頓首連拜。唯曰死罪。公止之。且詢來意。及姓名。對曰。李龜壽。盧龍塞人也。有人賂某令。不利于公。某感公之德。復爲花鵲所警。形不能匿。公能赦某罪。願以餘生事公。公曰。待汝以不死。遂命元

從都押衙傅存初錄之。明日旦有婦人至門。衣裝單急。曳履而背襁嬰兒。請於闈者曰。幸爲我語李龜壽。壽出。乃妻也。且曰。訝君稍遲。昨夜有薊來尋。及鐸卒。龜壽盡室亡去。

賈人妻



劍俠傳 卷三 賈人妻

七五

賈人妻

唐餘千縣尉王立調選。傭居大寧里。文書有誤。爲主司駁放。資財蕩盡。僕馬喪失。窮悴頗甚。每乞食於佛祠。徒行晚歸。偶與美婦人同路。或前或後。依隨。因誠意與言。氣甚相得。立因邀至其居。情款甚洽。翌日謂立曰。公之生涯何其困哉。妾居崇仁。資用稍備。儻能從居乎。立旣悅其人。又幸其洽。卽曰。僕之阨塞。陷於溝瀆。如此勤勤。所不敢望。然則子又何以營生。對曰。妾素賈人之妻也。夫亡十年。旗亭之內。尙有舊業。朝肆暮家。日贏錢三百。則可矣。公授官之期尙未。出遊之資且無。脫不見鄙。但同處以須冬集可矣。立遂就焉。聞其家豐儉得所。至於扃鑰之具。悉以付立。每出。則必先營辦立之一日饌焉。及歸。則又攜米肉錢帛以付立。日未嘗闕乏。憫其勤勞。因令傭買僕隸。婦託以

他事拒之。立不之彊也。周歲產一子。唯日中再歸爲乳耳。凡與立居二載。忽一日夜歸。意態傍徨。謂立曰。妾有寃仇。痛纏肌骨。爲日深矣。伺便復讎。今乃得志。便須離京。公其努力。此居處五百緡。自置契書在屏風中。室內資儲。一以相奉。嬰兒不能將去。亦公之子也。公其念之。言訖。收淚而別。立不可留止。視其所攜囊。乃人首耳。立甚驚愕。其人笑曰。無多疑慮。事不相縈。遂挈囊踰垣而去。身如飛鳥。立開門出送。則已不及矣。方徘徊於庭。遽聞卻至。立迫門接俟曰。更乳嬰兒。以畢離恨。就撫子。俄而復去。揮手而已。立迴燈窺帳。小兒身首已離矣。立惶駭。達旦不寐。則以財帛買僕。乘遊抵近邑。以伺其事。久之竟無所聞。某年立得官。卽貨鬻所居歸任。爾後終莫知其音問也。

劍俠傳 卷三 賈人妻

虬鬚叟



虬鬚叟

呂用之在維揚日。佐渤海王擅政害人。中和四年秋。有商人劉損。挈家乘巨船。自江夏至揚州。用之凡遇公私來。悉令偵覘行止。劉妻裴氏。有國色。用之以陰事下劉獄。納裴氏。劉獻金百兩免罪。雖脫非橫。然亦憤惋。因成詩三首。曰。寶釵分股合無緣。魚在深淵鶴在天。得意紫鸞休舞鏡。斷踪青鳥罷啣箋。金杯已覆難收水。玉軫長拋懶續絃。從此藤蘿山下過。遙將紅淚灑窮泉。其二。鸞飛遠樹棲何處。鳳得新梧想稱心。紅粉尚存香幕幕。白雲初散信沈沈。情知點污投泥玉。猶是經營買笑金。願作山頭似人石。丈夫衣上淚痕深。其三。舊嘗遊處偏尋看。雖是生離死一般。買笑樓前花已謝。畫眉窗下月空殘。雲歸巫峽音容斷。路隔星河去住難。莫道詩成無淚下。盡傾東海也應乾。詩

成吟詠不輟。因一日晚。凭水窗。見河街上一虬鬚老叟。行步迅速。骨貌昂藏。眸光射人。彩色晶瑩。如曳冰雪。跳上船來。揖損曰。子衷心有何不平之事。抱鬱塞之氣。損具對之。客曰。祇今便爲取賢閭及寶貨回。卽發。不可便停於此也。損察其意。必俠士也。再拜而啓曰。長者能報人間不平。何不去芟除根。豈更容奸黨。叟曰。呂用之屠割生民。奪君愛室。若令誅殛。固不爲難。實愆過已盈。神人共怒。祇候冥靈聚錄。方合身首支離。不唯難及一身。須殃連七祖。且爲君取其妻室。未敢逾越神明。乃入呂用之家。化形於斗拱上。叱曰。呂用之背違君親。時行妖孽。以苛虐爲志。以淫亂律身。仍於喘息之間。更慕神仙之事。冥官方錄其過。上帝卽議行刑。吾今錄爾形骸。但先罪以所取劉氏之妻。并其寶貨。速還前人。倘更悅色貪金。必見頭隨刀落。言訖鏗然。不見所適。用之驚懼。遽起焚香再拜。夜遣幹事。併齋金及裴氏還劉損。損不待明。促舟子

解維。虬鬚亦無跡矣。

韋
洵
美



韋洵美

韋洵美先輩。開平歲及第。受鄴都從事辟焉。及挈所寵素娥行。羅紹威聞其姝麗才藻。使賫二百疋。及生餽而露意焉。洵美無所容足。遂令妝束更衣。修緘獻之。素娥姓崔氏。亦大梁良家子。善諧謔。洵美乃不受辟。夜渡河。宿一寺。長吁而寢。曰。何處人能報不平事。寺有行者。排闥而揖曰。先輩畜何不平等。洵美具語之。歛然出門而去。至三更。忽擲一皮囊入門。乃貯素娥而至。侵曉問寺僧。言在寺打鐘。勤苦三十年。已不知所之。洵差卽遁跡他所。

李
勝



李勝

書生李勝。常遊洪州西山中。與處士盧齊及同人五六輩。雪夜共飲。座中一人偶言。雪勢如此。固不可出門也。勝曰。欲何之。吾能往。人因曰。吾有書籍在星子。君能爲我取乎。勝曰可。乃出門去。飲未散。攜書而至。星子至西山。凡三百餘里也。游唯觀中道士。嘗不禮於勝。勝曰。吾不能殺之。聊使其懼。一日。道士閉戶寢于室。勝令童子叩戶。取李處士七首。道士起。見所臥枕前。插一匕首。勁勢猶動。自是改心禮佛。

張
乖
崖



張乖崖

祝舜俞察院言。其伯祖隱居君。與張乖崖公居處相近。交游最密。公集首編寄祝隱居二詩是也。隱居東垣。有棗合拱矣。挺直可愛。張忽指棗謂隱居曰。子向我勿惜也。隱居許之。徐探手袖間。飛一短劍。約平人肩。斷棗爲二。隱居驚愕問之。曰。我往受此術於陳希夷。而未嘗爲人言也。又一日。自濮水還家。平野間遇見一舉子乘驢徑前。意甚輕揚。心慙生怒。未至百步。而舉子驢避道。張因就揖。詢其姓氏。蓋王元之也。問其引避之由。曰。我視君昂然飛步。神韻輕舉。知必非常人。故願加禮焉。張亦語之曰。我初視子輕揚之意。忿起于中。實將不利於君。今當回宿村舍。取酒盡懷。遂握手俱行。共話通夕。結交而去。

秀州刺客



劍俠傳 卷四

香山鄭官應陶齋校

秀州刺客

苗劉之亂。張魏公在秀州。議舉勤王之師。一夕獨坐。從者皆寢。忽一人持刀立燭後。公知爲刺客。徐問曰。豈非苗傅劉正彥遣汝來殺我乎。曰然。公曰。若是則取吾首級去可也。曰。我亦知書。豈肯爲賊用。况公忠義如此。何忍害公。恐防閑不嚴。有繼至者。故來相告耳。公問欲金帛乎。笑曰。殺公何患無財。然則留事我乎。曰。有老母在河北。未可留也。問其姓名。俯而不答。躡衣躍而登屋。屋瓦無聲。時方月明。去如飛。

張訓妻



張訓妻

張訓者。吳太祖之將校也。吳時人謂之大口張。吳太祖在宣州。嘗給諸將鎧甲。訓得故敝不如意。形於顏色。其妻謂之曰。此不足介意。但司徒不知。苟知之。必不爾。明日。吳公謂張曰。爾所得甲如何。張以告。公乃易之。後吳公移廣陵。嘗賜諸將馬。訓所得復駑弱。形不滿意。妻復言如前。明日。吳公又問之。訓以爲言。吳公曰。爾家事神耶。訓曰。無之。公曰。吾頃在宣州。嘗賜諸將甲。是夜夢一婦人。衣真珠衣。告予曰。公嘗賜張訓甲甚敝。當爲易之。今賜諸將馬。復夢前珠衣婦人告予曰。張馬非良馬也。其故何哉。訓亦莫之測也。訓妻有衣箱。常自啓閉。未嘗見之。一日。妻出。訓竊啓之。果見珠衣一襲。及妻歸。謂訓曰。君開吾衣箱耶。初其妻每食。必待其夫。一日。訓歸。妻已先食。謂訓曰。今日以

食味異常。不待君先食矣。訓入廚。見甑中蒸一人頭。訓心陰惡。欲殺之。妻謂曰。君欲負我耶。然君方爲數郡刺史。我不能殺君。因指一婢曰。殺我必先殺此。不爾君必不免。訓遂殺妻及其婢。後果爲刺史。

潘
辰



劍俠傳 卷四 潘辰

九五

潘辰

潘辰常遊江淮間。自稱野客。落托有大志。鄭匡國為海州刺史。辰往謁之。匡國不甚禮遇。館於外廡。一日從匡國獵。匡國之妻。因詣廡中。覘辰棲泊之所。做榻莞蓆竹籠而已。籠中有錫彈丸二顆。餘無所有。辰還。發籠視之。大驚曰。定為婦人所觸。幸吾攝其光鎰。不爾斷婦人頸矣。聞于匡國。匡國密召辰問曰。先生其有劍術乎。辰曰。素所習也。匡國曰。可一觀乎。辰曰。當齋戒三日。趨近郊平曠之地。請試之。匡國如期。召辰俱至東城。辰自懷中出二錫丸。置掌中。俄有氣二條。如白虹微出指端。須臾旋轉。遶匡國頸。其勢奔掣。其聲錚琤。匡國據鞍危坐。神魄俱喪。謝曰。先生神術。固已知之。幸收其威靈。辰笑舉一手。二白氣復貫掌中。少頃復為二錫丸。匡國自此禮遇愈厚。表薦于烈祖。

洪州書生



洪州書生

成幼文爲洪州錄事參軍。所居臨通衢而有窗。一日坐窗下。時雨過泥濘。路見一小兒賣鞋。狀甚貧窶。有一惡少年與兒相遇。搗鞋墮泥中。小兒哭求其價。少年叱之不與。兒曰。吾家旦夕無食。賣鞋營具。今悉爲所污。有書生過憫之。償其直。少年愧。怒罵曰。兒就我求錢。汝何賴焉。生甚有愠色。成嘉其義。召之與語。大奇之。因留宿。夜共話。成誓入內。復出。則失書生矣。外戶皆閉。求之不得。少頃復至前曰。旦來惡子。吾不能容。已斷其首。乃擲于地。成驚曰。此人誠忤君子。然斷人首流血在地。豈不見累乎。書生曰。無苦。乃出少藥。傅頭上。捽其髮瀝之。皆化爲水。因謂成曰。無可奉報。願以授君。成曰。某非方外之士。不敢領。書生長揖便去。重門鎖閉。竟不知所之。

義
俠



義俠

頃有士人爲畿尉。常在賊曹。有一賊繫械獄未具。尉獨坐廳上。賊乘間告曰。某非盜。公若脫。奉報有日。尉視其貌。且異其言。意已許之。佯若不知。夜呼獄吏放之。仍令吏逃竄。及明。獄中失囚。獄吏又走。府司譴罰而已。後官滿數年。客遊至一縣。聞縣宰與放囚姓名同。往謁之。果放囚也。因留中廳。對榻而寢。歡洽旬日。不入宅。一日歸。其妻問曰。公有何客。十日不入內耶。宰曰。某得此人大恩。性命所保。至今未能報之。妻曰。公不聞大恩不報。何不看時爲機。宰不語久之。乃曰。卿言良是。尉偶廁中。聞其言。急呼童僕。乘馬便走。衣裝悉不暇取。至夜已行五六十里。出縣界止宿。村居僕人怪其奔走。乃問其故。尉歇定。乃言此宰負恩之狀。言訖吁嗟。僕人亦泣下。忽見一人從牀下。持匕首出。

立。尉衆悉驚倒。其人曰。我義士也。宰使我來取君首。適聞說。方知此宰負恩。不然枉殺義士也。不捨此人矣。公且勿睡。當取宰頭。以雪其冤。尉心懼。媿謝而已。其人捧劍出門如飛。二更已返。呼曰。賊首至矣。命火觀之。乃宰頭也。揖別不知所之。

青巾者



青巾者

任愿。字謹叔。京師宦家子也。稍學書藝。家粗紹祖業。無他圖。但閉戶而已。熙寧二年正月上元。晝游街。時車騎駢溢。士女和會。愿醉仆觸良人家從姬。毆擊交至。毆既久。觀者環遶。有青巾忽不平。俄毆其人仆地。乃引愿而去。愿曰。與君舊無分極。蒙荷見救。青巾者三顧而去。異日。愿又遇青巾者在途中。召之飲。乃同入市邸。既坐熟視。目聳神峻。毅然可畏。飲甚久。愿謝曰。前日見辱於傭人。非豪義之士。則孰肯援哉。青巾曰。此乃小故。胡足多謝。後日復期子於此。無前卻也。乃各歸。愿及期而往。青巾者亦先至矣。共入酒肆。酒十餘舉。青巾者曰。吾乃刺客也。有至寃啣之數年。今始少伸。乃於跨間取烏革囊中出死人首。以刀截爲半。以半授愿。愿驚恐莫知措。青巾者食其肉無子遺。讓

愿。辭不食。青巾者笑。探手取愿盤中者。又食之。取腦骨以短刀削之。如劈朽木。棄之於地。復云。吾有術授子。能學之乎。愿曰。何術也。曰。吾能用點鐵爲金。愿曰。旗亭有先子別業。日得一緡。數口之家。寒絲暑葛。日食膏鮮。自謂踰分。常恐召禍。安敢學此。幸愛之。青巾者歎伏曰。如子真知命者也。子當有壽。乃出藥一粒。云服之百鬼不近。愿以酒服之。夜深乃散。後不復見焉。

溜川道士



淄川道士

淄川姜廉夫。祖寺丞。未第時。肄業鄉校。嘗與同舍生出遊。入神祠。觀捧印女子。塑容端麗。有惑志焉。戲解手帕。繫其臂爲定方。歸卽被疾。同舍謂其獲罪於神。使備牲酒往謝。於是力疾以行。奠享禮畢。諸生先還。姜在後失道。恍惚見白氣亘空。正當馬首。天將曉。始抵家。妻孥相視。問訊勞苦。方就枕。忽聞外間呵殿聲。一女子絕色。自輿出。上堂拜姜母啓焉。妾與郎君有嘉約。願得一見。姜聞欣然而起。姜妻引避。女請曰。吾久棄人間事。不可以我故。間汝夫婦之情。妻亦相拊。接懽如姊妹。女事姑甚謹。值端午節。一夕製綵絲百副。盡餉族黨。其人物花草。字畫點綴。歷歷可數。自是皆以仙姑稱之。居無何。與姑言。新婦有大厄。乞暫適他所避之。再拜而出門。遂不見。姜盡室驚憂。頃之。一道

士來問姜曰。君面不祥。奇禍將至。何爲而然。姜具以曲折告之。道士令於淨室設榻。明日復來。使姜徑就榻堅臥。戒家人須正午乃啓門。久之寒氣逼人。刀劍擊戛之聲不絕。忽若一物墜榻下。日午啓門。道士已至。姜出迎。笑曰。亡慮矣。令視墜物。乃一髑髏。如五斗大。出篋中刀圭藥滲之。悉化爲水。姜問其怪。道士曰。吾與此女皆劍仙。先與一人綢繆。遽舍而從汝。以故懷忿。欲殺汝二人。吾亦相與有宿契。特出力救汝。今事幸獲濟。吾去矣。纔去。女卽來同室如初。罹姜母之喪。哀哭嘔血。姜妻繼亡。撫育其子如己出。靖康之變。後不知所終。

劍俠傳 卷四 濫川道士

俠婦人



俠婦人

董國度。字元卿。饒州人。宣和六年進士第。調萊州膠水簿。會北兵動。留家于鄉。獨處官所。中原陷。不得歸。棄官走村落。頗與逆旅主人相得。憐其窮。爲買一妾。不知何許人也。性慧解。有姿色。見董貧。則以治生爲己任。罄家所有。買磨驢七八頭。麥數十斛。每得麵。自騎入市鬻之。至晚負錢以歸。如是三年。獲利益多。有田宅矣。董與母妻隔別滋久。消息杳不通。居常戚戚。意緒無聊。妾叩其故。董嬖愛已深。不復隱。爲言我故南官也。一家皆在鄉里。身獨漂泊。茫無歸期。每一想念。心亂欲死。妾曰。如是不早告我。我兄善爲人謀事。旦夕且至。請爲君籌之。旬日果有客。長身虬髯。騎大馬。驅車十餘乘。過門。妾曰。吾兄至矣。出迎拜。使董相見。敘嫻戚之禮。留飲至夜。妾始言前事。以屬客。是時

虜令凡宋官亡命。許自陳。匿不言而被首者死。董業已泄漏。又疑兩人欲圖已。大悔懼。乃給曰。無之。客忿然怒且笑曰。以女弟託質數年。相與如骨肉。故冒禁欲致君南歸。而見疑如此。倘中道有變。且累我。當取君告身。與我以為信。不然。天明執告官矣。董益懼。自分必死。探囊中文書悉與之。終夕涕泣。一聽於客。客去。明日控一馬來曰。行矣。董請妾與俱。妾曰。適有故。須少留。明年當相尋。吾手製一緋袍贈君。君謹服之。唯吾兄馬首所向。若返國。兄或舉數十萬錢相贈。當勿取。如不可御。則舉袍示之。彼嘗受我恩。今送君歸。未足以報德。當復護我去。萬一受其獻。則彼責已塞。無復顧我矣。善守此袍。亡失也。董愕然怪其語不倫。且慮鄰里知覺。輒揮涕上馬。疾馳到海上。有大舟臨解維。客麾使登。揖而別。舟遽南行。略無資糧。道路之費。茫不知所為。舟中奉侍甚謹。具食不相問訊。纔達南岸。客已先在水濱。邀詣旗亭相勞苦。出黃金二

十兩曰。以是爲太夫人壽。董憶妾語。力辭之。客不可曰。赤手還國。欲與妻子
餓死耶。強留金而出。董追挽之。示以袍。客曰。吾智果出彼下。吾事殊未了。明
年挈君麗人來。徑去不返。顧董至家。母妻二子俱無恙。取袍示家人。縫綻處
黃色隱然。折視之。滿中皆箔金也。踰年客果以妾至。偕老焉。

解
洵
婦



解洵婦

解潛與其弟洵。素相友愛。建炎靖康之際。潛積軍功。帥湖南。洵獨陷北境。其妻歸母家。又爲潰兵所掠。數年後。洵間關得歸。見潛相持悲慟。潛置酒勞苦。而語之曰。吾弟雖不幸流落。而兄幸蒙國恩。握兵權。每與虜及羣盜戰。奏功於朝。必爲弟竄名籍中。已至正使告命。皆在此。卽畀之。洵再拜謝過望。因言頃自汴都過河朔。孤單羈困。或見憐爲娶婦。匿裝豐厚。不暇深詳其出處。正無以爲活。殊用自慰。偶以重陽日。把盞起故妻之思。不覺墮淚。婦惻然曰。君豈非欲本朝乎。茲事易辦也。經旬日來告曰。川陸之計已具。惟命是從。我亦俱行。倘君夫人固存。自當家嫁。而分囊橐之半。萬一捐館。當爲偕老。遂登途。水宿山行。防閒營護。皆此婦力也。今在舟中。未敢輒參謁。潛嗟異。遂命車招

迎。見其眉宇秀整。言詞明慧。益加敬重。時荆楚爲盜區。潛屯枝山縣。以天氣向暑。別創一廬。令洵居止。且贈以四妾。洵意婦不相容。欲辭之。婦曰。正需也。得之誠大幸。當兒女撫之。何辭。然洵武夫。壯年稍移受。婦怏怏見辭色。一日因酒間責洵曰。故不記昔年乞食趙魏時事乎。非我力已爲餓莩矣。一旦得志。便爾忘恩。獨不內愧于心耶。洵方被酒。忽發怒。連奮拳毆其胸。婦嘻不動。又唾罵之。至詆爲老死魅。婦翻然起。燈燭陡暗。冷風襲人有聲。四妾怖而仆。少焉燈復明。洵已橫尸地上。喪其首。婦人并囊橐皆不見。從卒走報。潛使壯勇三千人出追捕。亡所獲。

角巾道士



角巾道士

京師人郭倫。元夕攜家觀燈。歸差晚。過委巷。值惡少年十輩。行歌而前。聯袂喧笑。睚眦窺伺。將遮侮之。倫度力不能勝。窘甚。忽有青衣角巾道人來。責衆曰。彼家眷夜歸。若輩那得無禮。衆怒曰。我輩作戲。何預爾狂道事。哄起攻之。婦女得乘間引去。倫獨留。道人勃然曰。果欲肆狂暴耶。吾今治汝矣。揮臂縱擊。如搏嬰兒。頃之皆顛仆哀叫。相率而遁。道人徐徐行。倫追及。拜謝曰。與先生素昧平生。忽蒙救護。脫妻子於危難。先生異人乎。念無以報德。敢問何所欲。曰。吾本無心。偶見不平事。義不容已。吾於世了亡所欲。豈望報哉。能一醉足矣。倫喜。邀至家痛飲。辭去曰。先生何之。曰。吾乃劍俠。非世人也。擲杯長揖。出門數步。耳中鏗然有聲。一劍躍出墜地。躡之騰空而去。

李鑿夫



續劍俠傳 卷一

香山鄭官應陶齋輯

李鑒夫

李鑒夫。不知何許人。宋太平興國初。來遊蓬池。居開元精舍。都寺未之奇也。一日偶窺先生。劍出眉間。爍爍如電。先生彈其鋏。且歌且舞。已復納於眉間。都寺大駭。始厚禮之。俄醉踣於路。以卒瘞之。未幾。或見於傍郡。歸告與先生雅游者。發其瘞。失所在。真仙通鑑

青邱子



續劍俠傳 卷一 青邱子

青邱子

青邱子者。不知何許人也。隱于武當山。游行天下已久。見者終莫測其年代。嘉靖間。有丹谿生。姓王名生。好尋名山。博採方術。有高蹈遐舉之想。偶因秋晴。游蹤誤入深山。見林壑幽秀。不覺愛玩忘歸。遂窮其跡。踐丹危。履翠險。或下或高。且數十里。隱映若有洞門。在斷崖絕澗中。水流花開。風氣似春。似非人迹所至。徘徊良久。忽聞洞中酣睡之聲。披榛竊視。一白鬢老父。枕石而臥。鼻息如雷。狀貌奇古。而衣冠杖履。飄囊並仙家裝束。生察其非凡也。屏息竦立。伺其寤。急趨下拜。老人驚問得入之由。具告所以。賜胡麻飯。與之食。謂曰。世人不信神仙。汝能冒險至此。真可教矣。然兒之先不聞有七世祖王重陽者乎。生曰。父母早喪。親族凋殘。莫知祖先蹤跡矣。老父曰。吾卽王重陽裔也。

兒好道。以明年八月十五爲期。待我西蜀琵琶峰下。今日方與南宮列真。期會此境。騎衛須臾卽來。汝乃凡夫。穢濁未除。必遭仙譴。可速尋歸路。遲則虎狼立至矣。生便叩謝而出。踉蹌下山。微聞簫管寥亮雲端。疑是羣仙赴會洞中。奔馳不及。逾五日始得達家。詰之于人。其先代果有重陽尊師道成仙去。生則其雲孫也。生自飯洞中胡廡。腹常不饑。顏色益少。轉盼間。明年中秋近矣。遂束裝渡江。然不悉琵琶峰在蜀中何地。憂惶靡寧。莫知所屆。一日。忽聞舟中同伴。朗吟七言詩。詩中卻有此峰名在。亟問其處。吟者曰。此卽巫山十二峰之一也。生喜不自勝。旅懷頓放。有頃。舟過巫山下。因告舟人。脫帆登岸。與同伴謝別而去。求尋其峰。積日始到。至中秋前一日晚。露宿峰頭。以候仙駕。遲明望見凌空跨鶴而來者。白鬚老父也。就地瞻仰作禮。父見生先在。笑曰。此兒大佳。真有心之士哉。但汝骨格未就。因緣尙隔一塵。今生止可學劍。

仙之術。游戲人間。吾非汝師。汝師是青邱子。見住武當山中。卻歸往尋。必得其真傳矣。生臨別。拜辭曰。不審青邱子居于武當山何峰。老父曰。六株松下。一茅庵。卽其居也。乃辭別出山。附舟入楚。纔經信宿。已達江陵。尋復抵于襄陽之武當山下。負囊獨上。緣磴躋攀。日向晚矣。忽見岩前蒼松六株。果有茅屋數間在焉。烟蘿四合。仄徑微通。叩門良久。始遇童子出而延入。仰視青邱先生。秀髮龐眉。倚樹而嘯。謂曰。爾祖王重陽使汝來也。拜罷。輒遣沐浴畢。令住庵後淨室中。給使。室中有藥鼎高數尺。周遭封固。紫焰光騰。照耀林壑。第敎生以守爐看火。添縮薪炭。不得擅離。妄視而已。每晝則有玉女持稠膏一甯。投鼎中攪和之。鼎中聲類霹靂。夜半則有青童復持稠膏。依前沃入。其聲瀟瀟如舊。此室之中。玉女二。青童二。女更番直應。日以爲常。偶問及鼎中何物。皆笑而不對。先生已具知之。愠怒詬責。便欲驅逐出門。衆相詭請。乃止。後

遂不敢發問。久之丹鼎成矣。其金液計可六百餘斤。分而爲二。又析之至七八斤而止。移置大磐石上搗之。晝作夜息。漸漸而薄。因成鐵片。擇甲午丙午諸日。鑄成六劍。懸於絕壁之下。以飛瀑濺激其上。日月之光華燭之。歷經旬朔。劍質始柔。此六劍各有名目。先生舉其一畀生。令童子開其腦後臂間藏之。亦亡所苦。卻令齋心七日。盡傳擊刺之秘。命生往青城山中。結茅棲止。誠無妄用其劍。第一不得作世間非法事。自干天誅。又以其四。分授二青童。二玉女。其一自佩。于是使生下山。生住青城山。一年後復來。至則室廬如故。扃戶無人。問山中道士。道士曰。青邱先生去且一年矣。生慟哭而還。忽於荆南道上。見先生溷跡丐者之中。乃相隨同去。不知所之。世傳丹谿生鑄劍經僅二十五紙。是青邱所傳古本。有人曾見此書。繪圖

續劍俠傳 卷一 青邱子

頂缸和尚



頂缸和尚

頂缸和尚名真顛。不知何許人也。善擊劍。得分身隱形之術。或云僧俠。或云劍仙。昔年雲游過山陰縣。聞祝秀才良柱好道。喜延方外士。留止其家一月。出入往來。變幻莫測。日噉牛肉數斤。及酒麵亡算。頭上常戴五斗缸。且行且走。折旋如螻。觀者無不異之。每當月明之夜。巢於樹巔。作曼聲長嘯。尤善超越。攀垣直上。捷若猿猱。然多坐臥於壁上。與人行。忽不見。已復在旁。人莫測其處也。臨去前一夕。命置酒。酒至。連舉數大白。謂祝生曰。吾爲若設戲。若爲我秉燭。生素有膽氣。便攜燭立屏風下。忽見杖頭一掣。劃然聲裂。有白烝長數十丈。狀如素霓。環繞其身。左盤右旋。蓬轉數迴。但覩衣色成規。倏忽失處。時門戶皆鑷。求之不得矣。少頃。則依然坐于堂上焉。五更酒盡。明月西行。竟不知其所之。繪圖

李福建



李福建

嘉靖初。有李福建者。扶溝縣人也。故爲千侯。能分身散影。役使山魃。坐致行廚。興雲騰雨。飛沙走石。奇幻之事。不可勝紀。世莫知其授也。一日過太湖。蛟拔其舟。風濤大作。李怒。飛劍斬蛟。少頃。見一蛟浮出。湖水盡赤。李命庖人取蛟鮓之。繪圖

門客



門客

一門客游大老家。久而無所事事。一日方羣相宴坐。大老曰。客何好。曰。客無好也。曰。客何能。曰。客無能也。舉坐皆笑。客曰。亦有微長。能箍桶。大老曰。請面試之。命放一鐵箍舊桶。去席五尺許。取竹於座上。編成圈。隨手擲之。其箍已將桶腰收密。而舊鐵箍落矣。再作一圈。復如前。擲之。恰箍桶底。而底舊鐵箍又落矣。大老驚曰。神技也。客必有他能。願賜觀之。勿秘。客笑曰。彈雀可乎。腰出小刀二寸許。向簷間擲。飛雀。腰截落地。而小刀依然在手。連擲四五雀。皆然。徐收繞於指。若一環狀。而後藏之。大老駭甚。知其劍俠也。厚贈而遣之。柳

大鐵椎



大鐵椎傳

大鐵椎。不知何許人也。北平陳子燦省兄河南。與遇宋將軍家。宋懷慶青華鎮人。工技擊。七省好事者皆來學。人以其雄健。呼宋將軍云。宋弟子高信之。亦懷慶人。多力善射。長子燦七歲。少同學。故嘗與過宋將軍。時座上有健啖客。貌甚寢。右脅夾大鐵椎。重四五十斤。飲食拱揖不暫去。柄鐵摺疊環複。如鎖上練。引之長丈許。與人罕言語。語類楚聲。扣其鄉及姓字。皆不答。既同寢。夜半。客曰。吾去矣。言訖不見。子燦見窗戶皆閉。驚問信之。信之曰。客初至。不冠不襪。以藍手巾裹頭。足纏白布。大鐵椎外。一物無所持。而腰多白金。吾與將軍俱不敢問也。子燦寐而醒。客則鼾睡坑上矣。一日。辭宋將軍曰。吾始聞汝名以爲豪。然皆不足用。吾去矣。將軍強留之。乃曰。吾嘗奪取諸响馬物。不

顛者輒擊殺之。衆魁請長其羣。吾又不許。是以讎我。久居此。禍必及汝。今夜半。方期我決門某所。宋將軍欣然曰。吾騎馬挾矢以助勢。客曰止。賊能且衆。吾欲讓汝。則不快我意。宋將軍故自負。且欲觀客所爲。力請客。客不得已與偕行。將至門處。送將軍登空堡上曰。但觀之。慎勿聲。令賊知汝也。時鷄鳴。月落。星光照曠野。百步見人。客馳下。吹籥築數聲。頃之。賊二十餘騎四面集。步行負弓矢。從者百許人。一賊提刀縱馬奔客曰。奈何殺我兄。言未畢。客呼曰。椎。賊應聲落馬。馬首盡裂。衆賊環而進。客從容揮椎。人馬四面仆地下。殺三十許人。宋將軍屏息觀之。股栗欲墮。忽聞客大呼曰。吾去矣。地塵且起。黑烟滾滾。東向馳去。後遂不復至。

魏禧論曰。子房得滄海君力士。椎秦皇帝博浪沙中。大鐵椎其人與。天生異人。必有所用之。予讀陳同甫中興遺傳。豪俊俠烈魁奇之士。泯泯然不見功

名於世者。又何多也。豈天之生才不必爲人用與。抑用之自有時與。子燦遇大鐵椎。爲壬寅歲。視其貌當年三十。然則大鐵椎今四十耳。子燦又嘗見其寫市物帖子。甚工楷書也。魏叔子文集

高髻女尼




高髻女尼

新城令崔懋。以康熙戊辰往濟南。至章邱西之新店。遇一婦人。可三十餘。高髻如宮粧。髻上加氈笠。錦衣弓鞋。結束爲急裝。腰劍騎異衛。極神駿。婦人神采四射。其行甚駛。試問何人。漫應曰。不知何許人。將往何處。又漫應曰。去處去。頃刻東逝。疾若飛隼。崔云。惜赴郡匆匆。未暇躡其蹤跡。疑劍仙也。從姪鶴因述萊陽王生言。順治初。其縣役某解官銀數千兩赴濟南。以木夾函之。晚將宿逆旅。主人辭焉。且言鎮西北里許有尼庵。凡有行囊者。皆往投宿。因導之往。方入旅店。時門外有男子。著紅幘頭。狀貌甚穉。至尼庵。入門有廊。三間東向。牀榻具設。北爲觀音大士殿。殿側有小門扃焉。叩門久之。有老嫗出應。告以故。嫗云。但宿西廡無妨。久之持硃封鑰山門而入。役相戒勿寢。明燈燭。

手弓刀以待曙。至三更。大風驟作。山門砉然而闢。方愕然相顧。倏聞呼門聲甚厲。衆急持械。謀拒之。扉門已啓。視之。卽紅幘頭人也。徒手握束香擲地。衆皆仆。比天曉始甦。已亡矣。急往市詢逆旅主人。主人曰。此人時游市上。無敢誰何者。唯投尼庵者輒無恙。今當往愬耳。然尼異人。須吾自往求之。至則嫗出。問故。曰。非爲夜失官銀事耶。曰然。入白。頃之尼出。嫗挾蒲團敷坐。逆旅主人跪白前事。尼笑曰。此奴敢來此作狡獪。罪合死。我當爲一決。顧嫗入。牽一黑衛出。取劍臂之。跨衛向南山逕去。其行如飛。倏忽不見。市人集觀者數百人。移時。尼徒步。手人頭。驅衛返。驢背負木夾函數千金。殊無所苦。入門呼役曰。來視汝木夾官封如故乎。驗之。良是。擲人頭地上曰。視此賊。不錯殺卻否。衆聚觀。果紅幘頭人也。羅拜謝去。比東歸。再往訪之。庵已空無人矣。尼高髻盛妝。衣錦綺。行纏羅襪。年十八九。好女子也。市人云。尼三四年前。挾嫗俱

來。不知何許人。常有惡少夜入其室。腰斬擲垣外。自是無敢犯者。漁洋文略

偉男子



偉男子

某中丞巡撫上江。一日遣吏賫金數千。赴京師。途宿古廟中。扁鐫甚固。晨起已失金所在。而門鑰宛然。怪之。歸以告中丞。中丞怒。亟責償。官吏告曰。償固不敢辭。但事甚疑怪。請予假一月。往蹤跡之。願以妻子爲質。中丞許之。比至失金處。詢訪久之。無所見。將歸矣。忽於市中遇瞽叟。胸懸一牌。云善決大疑。漫問之。叟忽曰。君失金多少。曰若干。叟曰。我稍知蹤跡。可覓露車乘我。君第隨往。冀可得也。如其言。初行一日。有人烟村落。次日入深山。行不知幾百里。無復村堡。至三日。踰亭午。抵一大市鎮。叟曰至矣。君但入。當自得消息。不得已。第從其言。比入市。則肩摩轂擊。萬瓦鱗次。忽一人來問曰。君非此間人。奚至此。告以故。與俱至市口。覓瞽叟。已失所在。乃與曲折行數街。抵一大宅。如

王公之居。歷堦及堂。寂無人。戒令少待。頃之傳呼。令人至後堂中。惟設一榻。有偉男子科跣坐其上。髮長及髻。童子數人。執扇拂左右侍。拜跪訖。男子詢來意。具以對。男子頤指語童子曰。可將來。卽有少年數輩。扛金至。封識宛然。曰。寧欲得金乎。吏叩頭曰。幸甚。不敢請耳。男子曰。乍來此。且好將息。卽有人引至一院。扃門而去。餽之食。極豐腴。是夜。月明如晝。啓後戶視之。見粉壁上纍纍有物。審視之。皆人耳鼻也。大驚。無隙可逸去。徬徨達曉。前人忽來傳呼。復至後堂。男子科跣坐如初。謂曰。金不可得矣。然當予子一紙。輒據案作書。擲之揮出。前人復導至市口。愴恍疑夢中。急覓路歸。見中丞歷述前事。叱其妄。出書呈之。中丞啓緘。忽色變而入。移時。傳令吏歸舍。釋妻子。豁其賠償。吏大喜過望。久之。乃知書中大略斥中丞貪縱。謂勿責吏償金。否則某月日。夫人夜三更睡覺。髮截三寸。寧忘之乎。問之。夫人良然。始知其劍俠也。漁洋文

略

琵琶瞽女



琵琶瞽女

金陵卜者。好女子也。雙目瞽。挾琵琶。漫游徧宇內。然其行無侍衛。止宿亦無常所。一日。吳江急足某者。遇諸塗。時積雨乍晴。潦水沒踝。行人艱危。獨見女子飛浮水面。衣袂皆無沾漬。急足大驚。陰尾之。出郊野。徘徊間。忽回顧曰。若何爲者。急足跪請曰。下邑執役。侯京兆指揮。久不得當。無所自存。今幸遇夫人。願從仙去耳。女子笑曰。且休。今夜令若獲金一斤足矣。遂別。望女子行若驚帆。急足不得已歸。夜中果獲金一斤。竊自幸。因再往伺之。忽聞女子在後。徐呼曰。若又何爲者。急足復跪請曰。夫人真仙也。牀頭金已盡。惟夫人是從。女子曰。無多言。汝於數更得金一鎰。遂別。乃行視前。益快。如迅雷。急足至夜不寐。黎明恍惚間。金已在。前一鎰。又一七首。霜刃冽然。擲地有聲。急足惶

怖懼伏。良久心悟。不敢復往。伺有朝貴墨而淫縱。知其事。豔之。必欲羅致。遣卒四出。責治期限。然無見也。忽夜半所居四壁皆琵琶聲。或前或後。或聞或不聞。舉家驚悸。不知所從來。日出忽聞火聲。砰然起空中。一琵琶落枕上。分烈爲二。內得書一札。字跡端勁。大略言國家倚毗公等。外禦邊疆。內循郡邑。任重身微。神爽或墮。報塞無由。夫心不清者。智慮短。慾太盛者。年壽促。又曰。天下驛騷。民命如倒懸。公等安享作奸。貪得靡極。妾雖女子。能斷公首。朝貴得書惶悚。不久竟因他事下獄。棄市淮南。有沈隆生者。與女子邂逅丹陽。授以吐納祕傳。順治年間人。猶有見之者。吳陳琰文集

續劍俠傳 卷一 琵琶瞽女

燕赤霞



燕赤霞

寧采臣。浙人。性慷慨。廉隅自重。每對人言。生平無二色。適赴金華。至北郭。解裝蘭若寺。中殿塔壯麗。然蓬蒿沒人。似絕行蹤。東西僧舍。雙扉虛掩。惟南一小舍。扃鍵如新。又顧殿東隅。修竹拱把。下有巨池。野藕已花。意樂其幽杳。會學使按臨。城舍價昂。思便留止。遂散步以待僧歸。日暮。有士人來啓南扉。寧趨爲禮。且告以意。士人曰。此間無房主。僕亦僑居。能甘荒落。旦晚惠教。幸甚。寧喜。藉藁代牀。支板作几。爲久客計。是夜。月明高潔。清光似水。二人促膝殿廊。各展姓字。士人自言燕姓。字赤霞。寧疑爲赴試諸生。而聽其聲音。絕不類浙。詰之。自言秦人。語甚樸誠。旣而相對詞竭。遂拱別歸寢。寧以新居。久不成寐。聞舍北喁喁。如有家口。起伏北壁石窗下。微窺之。見短牆外一小院落。有

婦人可四十餘。又一媪衣黝。蓬首鮐背龍鍾。偶語月下。婦曰。小倩何久不來。媪曰。殆好至矣。婦曰。將無向姥。姥有怨言否。曰。不聞。但意似戚戚。婦曰。婢子不宜好相識。言未已。有一十七八歲女子來。彷彿豔絕。媪曰。背地不言人。我兩箇正談道。小妖婢悄無迹響。幸不訾著短處。又曰。小娘子端好。是畫中人。遮莫老身是男子。也被攝魂去。女曰。姥姥不相譽。更阿誰道好。婦人女子又不知何言。寧意其鄰人眷口。寢不復聽。又許時。始寂無聲。方將睡去。覺有人至寢所。急起審顧。則北院女子也。驚問之。女笑曰。月夜不寐。願修燕好。寧正容曰。卿防物議。我畏人言。略一失足。廉恥道喪。女曰。夜無知者。寧又咄之。女逡巡若復有詞。寧叱速去。不然當呼南舍生知。女懼乃退。至戶外復返。以黃金一錠置褥上。寧投擲庭堦曰。非義之物。污我囊橐。女慚出。拾金自言曰。此漢當是鐵石。詰旦。有蘭溪生攜一僕來候試。寓於東廂。至夜暴亡。足心有小

孔如錐刺者。細細有血出。俱莫知故。經宿一僕死。症亦如之。向晚。燕生歸。寧質之。燕以爲魅。寧素伉直。頗不在意。宵分。女子復至。謂寧曰。妾閱人多矣。未有剛腸如君者。君誠聖賢。妾不敢欺。小倩姓聶氏。十八夭殂。葬寺側。輒被妖物威脅。役賤務。覩顏向人。實非所樂。今寺中無可殺者。恐當以夜叉來。寧駭求計。女曰。與燕生同室可免。問何不惑。燕女曰。彼奇人也。不敢近。問迷人若何。曰。初暈我者。隱以錐刺其足。彼卽茫然迷。因攝血以供妖飲。又或以金。非金也。乃羅剎真骨。留之能截取人心肝。二者凡以投時好耳。寧感謝。問戒備之期。答以明宵。臨別泣曰。妾墮孽海。求岸不得。郎君義氣干雲。必能拔生救苦。倘肯愛妾朽骨。歸葬安宅。不啻再造。寧毅然許之。因問葬處。曰。但記取白楊之上。有烏巢者是也。言已出門。歛然而滅。明日恐燕他出。早詣邀致。辰後具酒饌。留意察燕。既約同宿。辭以性癖耽寂。寧不聽。強攜臥具來。燕不得已。

移榻從之。囑曰：僕知足下丈夫。傾風良切。要有微衷。難以遽白。幸勿翻窺篋。違之兩俱不利。寧謹受教。既而各寢。燕以箱篋置窗上。就枕移時。訥如雷。寧不能寐。近二更許。窗外隱隱有人影。俄而近窗來窺。目光睽閃。寧懼方欲呼燕。忽有物裂篋而出。耀若匹練。觸折窗上石櫺。欻然一射。卽遽斂入。宛如電滅。燕覺而起。寧僞睡以覘之。燕捧篋檢取一物。對月嗅視。白光晶瑩。長可二寸徑。韭葉許。已而數重包固。仍置破篋中。自語曰：何物老魅。直爾大膽。致壞篋子。遂復臥。寧大奇之。因起問之。且以所見告。燕曰：旣相知愛。何敢深隱。我劍客也。若非石櫺妖。當立斃。然亦傷矣。問所緘何物。曰：劍也。適嗅之。有妖氣。寧欲觀之。慨出相示。熒熒然一小劍也。於是益厚重燕。明日視窗外有血迹。遂出寺北。見荒坟纍纍。果有白楊。烏巢其巔。迨營謀旣就。聚裝欲歸。燕生設祖帳。情義殷渥。以破革囊贈寧。曰：此劍袋也。寶藏可遠魑魅。寧欲從授。

其術曰。如君信義剛直。可以爲此。然君猶富貴中人。非道中人也。寧乃託有妹葬此。發掘女骨。斂以衣衾。賃舟而歸。寧齋臨野。固營墳葬諸齋外。祭而祝曰。憐卿孤魂。葬近蝸居。歌哭相聞。度不見陵於雄鬼。一甌漿水。飲殊不清旨。幸不爲嫌。祝畢而返。後有人呼曰。緩待同行。回顧則小倩也。歡喜謝曰。君信義。十死不足以報。請從歸。拜識嫖姑。媿御無悔。審諦之。肌映流霞。足翹細筍。白晝端相。嬌豔尤絕。遂與俱至齋中。囑坐少待。先入白母。母愕然。時寧妻久病。母戒母言。恐所驚駭。言次。女已翩然入。拜伏地下。寧曰。此小倩也。母驚顧不遑。女謂母曰。兒飄然一身。遠父母兄弟。蒙公子露覆。澤被髮膚。願執箕帚。以報高義。母見綽約可愛。始敢與言。曰。小娘子惠顧吾兒。老身喜不可已。但生平止此兒。用承祧續。不敢令有鬼偶。女曰。兒實無二心。泉下人無不見於老母。請以兄事。依高堂。奉晨昏如何。母憐其誠。允之。卽欲拜嫂。母辭以疾。乃

止。女卽入廚下。代母尸饗。入房穿戶。似熟居者。日暮母畏懼之。辭使歸寢。不爲設牀褥。女窺知母意。卽竟去。過齋欲入。卻退徘徊戶外。似有所懼。生呼之。女曰。室中劍氣畏人。向道路之不奉見者。良以此故。寧已悟爲革囊。取懸他室。女乃入。就燭下坐。移時殊不一語。久之問夜讀否。妾少誦楞嚴經。今強半遺忘。浼求一卷。夜暇就兄正之。寧諾。又坐默然。二更向盡。不言去。寧促之。愀然曰。異域孤魂。殊怯荒墓。寧曰。齋中別無牀寢。且兄弟亦遠嫌。女起。容顰感而欲啼。足偃僂而懶步。從容出門。涉階而沒。寧竊憐之。欲留宿別榻。又懼母嗔。女朝旦朝母。捧匱沃盥。下堂操作。無不曲承母志。黃昏告退。輒過齋頭。就燭誦經。覺寧將寢。始慘然去。先是寧妻病廢。母劬不可堪。自得女。逸甚。心德之。日漸稔。親愛如己出。竟忘其爲鬼。不忍晚令去。留與同臥起。女初來。未嘗食飲。半年漸啜稀餼。母子皆溺愛之。諱言其鬼。人亦不之辨也。無何寧妻亡。

母陰有納女意。然恐於子不利。女微窺之。乘間告母曰。居年餘。當知兒肝鬲。爲不欲禍行人。故從郎君來。區區無他意。止於公子光明磊落。爲天人所欽。矚實欲依贊三數年。借博封誥。以光泉壤。母亦知其無惡。但懼不能延宗嗣。女曰。女子惟天所授。郎君註福籍。有亢宗子三。不以妻鬼而遂奪也。母信之。與子議。寧喜。因列筵告戚黨。或請觀新婦。慨然華妝出。一堂盡哈。反不疑鬼。疑爲仙。由是五黨諸內眷。咸執贄以賀。爭拜識之。女善畫蘭梅。輒以尺幅酬答。得者藏什襲以爲榮。一日。俛頸窗前。招悵若失。忽聞革囊何在。曰。以卿異之故。緘置他所。曰。妾受生氣已久。當不復畏。宜取掛牀頭。寧詰其意。曰。三日來。心怔忡無停息。意金華妖物。恨妾遠遁。恐旦晚尋也。寧果攜革囊來。女反復審視。曰。此劍仙將盛人者也。敝敗至此。不知殺人幾何。許妾今日視之。肌猶栗悚。乃懸之。次日。又命移懸戶上。夜對燭獨坐。約寧勿寢。歛有一物。如飛

鳥墮。女驚匿夾幙間。審視之物如夜叉狀。電目血口。睽閃攫拏而前。至門卻步。逡巡久之。漸近革囊。以爪摘取。似將爪裂囊。忽格然一響。大可合簣。恍惚有鬼物突出半身。揪夜又入。聲遂寂。囊亦頓縮如故。寧駭詫。女亦出。大喜無恙矣。共視囊中。清水數斗而已。後數年。寧果登進士。舉一男。納妾後。又各生男。皆仕進有聲。

聊齋誌異

俠
女



續劍俠傳 卷二

香山鄭官應陶齋輯

俠女

顧生。金陵人。博於才藝。而家甚貧。又以老母。不忍離膝下。惟日爲人書畫。受贄以自給。行年二十有五。伉儷猶虛。對戶舊有空第。適有老嫗及少女稅居其中。以其家無男子。故未問其誰何。一日。偶自外入。見女郎自母房中出。年約十八九。秀麗都雅。世罕其匹。見生不甚避。而意凜如也。生入問母。母曰。是對戶女郎。就吾乞刀尺。適言其家亦只一母。此母女不是貧家產。問其何爲不字。則以母病爲辭。明日當往拜其母。便風以意。倘所望不奢。兒可代養其老。明日造其室。其母一聾媪耳。視其室。並無隔宿糧。問所業。則仰女十指。徐

以同食之謀試之。媪意似納。而轉商其女。女默然。意殊不然。母乃歸詳其狀。而疑曰。女子得非嫌吾貧乎。爲人不言亦不笑。絕如桃李。而冷如霜雪。奇人也。母子猜歎而罷。一日。生坐齋頭。有少年來求畫。姿容甚美。言頗儂佻。詰其所自。以鄰村對。嗣後二三日。輒一至。稍稍稔熟。漸以嘲謔。生狎抱之。亦不甚拒。遂私焉。由此往來暱甚。會女郎過。少年目送之。問以爲誰。對以鄰女。少年曰。豔麗如此。神情一何可畏。少間生入內。母曰。適女子來乞米云。不舉火者經日矣。此女至孝。貧極可憫。宜少周卹之。生從母言。負斗粟款門而達母意。女受之。亦不申謝。日嘗至生家。見母作衣履。便代縫紉。出入堂中。操作如婦。生益德之。每獲餽餌。必分給其母。女亦略不置齒頰。母適疽。生陰處。宵旦號咷。女時就榻省視。爲之洗瘡敷藥。日三四作。母意甚不自安。而女不厭其穢。母曰。唉。安得新婦如兒。而奉老身以死也。言訖悲哽。女慰之曰。郎子大孝。勝

我寡婦孤女什百矣。母曰。牀頭蹠踐之役。豈孝子所能爲者。且身已向暮。旦夕犯霧露。深以祧續爲憂耳。言間生入。母泣曰。虧娘子良多。汝無忘報德。生伏拜之。女曰。君敬我母。我弗謝也。君何謝焉。於是益敬愛之。然其舉止生硬。亮不可干。一日。女出門。生目注之。女忽回首嫣然而笑。生喜出意外。趨而從。諸其家。挑之亦不拒。欣然交歡已。戒生曰。事可一而不可再。生不應而歸。明日。生又約之。女厲色不顧而去。日頻來時。相遇並不假以詞色。生稍遊戲之。則冷語冰人。忽於空處問生曰。適來少年誰也。生告之。女曰。彼舉止狀態。無禮於妾頻矣。以君之狎暱。故置之。請便寄語。再復爾。是不欲生也已。少年至。生以告。且曰。子必慎之。是不可犯。少年曰。旣不可犯。君何犯之。生白其無。曰。如其無。則猥褻之語。何以達君聽哉。生不能答。少年曰。亦煩寄語。假惺惺勿作態。不然我將徧播揚。生甚怒之。情見乎色。少年方去。一夕獨坐。女忽至。笑。

曰。我與君情緣未斷。寧非天數。生狂喜而抱於懷。歛聞履聲籍籍。兩人驚起。則少年推扉入矣。生驚問子胡爲者。笑曰。我來觀貞節之人耳。顧女曰。今不怪人耶。女眉豎頰紅。默不一言。急翻上衣。露一革囊。應手而出。則尺許晶瑩七首也。少年見之。駭而卻走。追出戶外。四顧渺然。女以七首望地拋擲。嘎然有聲。燦若長虹。俄一物墮地作響。生急燭之。則一白狐。身首異處矣。大駭。女曰。此君之變童也。我固恕之。奈渠定不欲生何。收刃入囊。生拽令入曰。適以妖物敗意。請俟來宵。出門還去。次夕。女果至。遂共綢繆。詰其術。女曰。此非君所知。宜須慎秘。洩恐不爲君福。又訂以嫁娶。曰。枕席焉。提汲焉。非婦伊何也。業夫婦矣。何必復言嫁娶乎。生曰。將勿憎我貧耶。曰。君固貧。妾富耶。今宵之聚。正以憐君貧耳。臨別囑曰。苟且之行。不可以屢。當來我自來。不當來相強無益。後相值。每欲引與私語。女輒走避。然衣綻炊薪。悉爲經理。不啻婦也。積

數月。其母死。生竭力營葬之。女由是獨居。生意其孤寂可亂。踰垣入。隔窗頻呼。迄不應。視其門。則空室扃焉。竊疑有他約。夜復往。亦如之。遂留珮玉於窗間而夫之。越日。相遇於母所。既出。而女尾其後。曰。君疑妾耶。人各有心。不可以告人。今欲使君無疑而烏可得。然一事煩急爲謀。問之。曰。妾體孕已八月矣。恐旦晚臨盆。妾身未明。能爲君生之。不能爲君育之。可密告老母。覓乳媪。僞爲討螟蛉者。勿言妾也。生諾以告母。母笑曰。異哉。此女聘之不可。而顧私於我兒。喜從其謀以待之。又月餘。女數日不出。母疑之。往探其門。蕭蕭閉寂。叩良久。女始蓬頭垢面。自內出。啓而入之。則復闔之。入其室。則呱呱者在牀上矣。母驚問誕幾時矣。答云三日。捉紉席而視之。男也。且豐頤而廣額。喜曰。兒已爲老身育孫矣。伶仃一身。將焉所託。女曰。區區隱衷。不敢掬示老母。俟夜無人。可卽抱兒去。母歸與子言。竊共異之。夜往抱子歸。更數夕。夜將半。女

忽款門入。手提革囊。笑曰。大事已了。請從此別。急詢其故。曰。養母之德。刻刻不去於懷。向云可一而不可再者。以相報不在牀第也。爲君貧不能婚。將爲延一綫之續。本期一索而得。不圖信水復來。遂至破戒而再。今君德旣酬。妾志已遂。無憾矣。問囊中何物。曰。仇人頭耳。檢而窺之。鬚髮交而血糝糊也。駭絕。復致研詰。曰。向不與君言者。以機事不密。懼有宣洩。今事已成。不妨相告。妾浙人。父官司馬。陷於仇。彼籍吾家。妾負老母出。隱姓名。埋頭項。已三年矣。所以不卽報者。徒以老母在。母去。一塊肉。又累腹中。因而遲之久。曩夜出。非他。道路門戶未稔。恐有訛誤耳。言已出門。又囑曰。所生兒。善視之。君福薄無壽。此兒可光門閭。夜深不得驚老母。我去矣。方悽然欲詢所之。女一閃如電。瞥爾間。遂不復見。生歎惋。木立若喪魂魄。明日告母。相爲嗟異而已。後三年。生果卒。子十八舉進士。猶奉祖母以終老云。

聊齋誌異

佟客



佟客

董生。徐州人。好擊劍。每慷慨自負。偶在途中。遇一客。跨蹇同行。與之語。談吐豪邁。詰其姓字。云遼陽佟姓。問何往。曰。余出二十年。適自海外歸耳。董曰。君遨遊四海。聞人慕多。曾見異人否。佟問異人何等。董乃自述所好。恨不得異人所傳。佟曰。異人何地無之。要必忠臣孝子。始得傳其術也。董又奮然自許。卽出佩劍。彈之而歌。又斬路側小樹。以矜其利。佟掀髯微笑。因使借觀。董授之。展玩一過。曰。此鐵甲所鑄。爲汗臭所蒸。最爲下品。僕雖未聞劍術。然有一劍頗可用。遂於衣底出短刃。尺許。以削董劍。毳如瓜瓠。應手斜斷。如馬蹄。董駭極。亦請過手。再三拂拭。而後反之。邀佟過諸其家。堅留信宿。叩以劍法。謝不知。董按膝雄談。惟敬聽而已。更旣深。忽聞隔院紛拏。隔院爲生父居。心驚

疑。近壁凝聽。但聞人作怒聲曰。教汝子速出就刑。便赦汝。少頃。似加榜掠。呻吟不絕者。直其父也。生提戈欲往。佟止之曰。此去恐無生理。宜審萬全。生皇然請教。佟曰。直坐名相索。必將甘心焉。君無他骨肉。宜囑後事於妻子。我啓戶爲君驚廝僕。生諾。入告其妻。妻牽衣泣。生壯念頓消。遂共登樓上。尋弓覓矢。以備盜攻。倉皇未已。聞佟在樓簷上笑曰。賊幸去矣。燭之已杳。逡巡出。則見翁赴鄰飲。籠燭始歸。惟庭前多編菅遺灰焉。乃知佟異人也。聊齋誌異

毛
生



毛生

前明熹廟時。天下多故。盜賊充斥。錦帆綠林之徒。所在多有。洪州數舉子入都。挾資頗重。淮徐之間。一少年求附舟。叩其所自。自云。施姓。蓋亦應春官試者。爲獨行恐盜。故來。語作吳音。窺其行李衣冠。似是烏衣子弟。旣入舟。取筩中佳茗。煎以江水。徧飲同袍。俊語名談。傾一座。衆皆悅之。以爲良友。恐不得當也。已而江岸夕陽。亂流明滅。孤舟泊蘆葦間。少年進曰。江天暮景。殊佳。某有短笛。願爲諸君一奏。遂擲管倚篷吹之。悠揚數弄。直使魚龍驚飛。蟾兔欲躍。衆皆擊節曰。桓伊李牟。今復生矣。語未畢。忽一豪客躍入舟中。持一鐵柄傘。奮擊少年。墮水死。呵曰。忤奴不巧。食村落。來此奚爲。衆視其人。形容怪偉。鬚髮林林如豎戟。皆駭極。仆跌結舌。重呼曰。賊賊。客曰。公等非赴試者耶。曰然。有重資耶。曰有之。願獻賊。賊毋殺我。客笑曰。余不殺賊。賊直且殺公。適吹

笛號衆者是也。衆皆起謝。客曰。賊衆且悍。夜將報余。畏者可暫去。前三里村高龔店。一宿無患也。不畏者留。更看余殺賊。於是去者半。留者半。客戒留者先寢。聞呼則起視。自引酒狂飲。連飛數十觥。不醉。飲罷。取鐵柄傘枕之臥。鼾聲如雷霆。衆假寐俟之。夜半。忽聞客呼曰。賊至矣。拔傘踞船頭。時月黑星繁。微辨人影。一賊持刀奔客曰。若殺我弟。我今取若頭。客不答。舉傘格之。賊應手而仆。刀藥環進。客從容揮傘。呼呼作風聲。與蘆葦琴瑟相應。賊左右撲刺落水。餘賊奔逃。客已奪得賊弓矢。連發射之。盡告斃。觀者股栗。汗流浹衣。裾客挾傘入艙坐。神氣灑然。衆酌酒勞客。復飛數十觥。掀髯謂衆曰。公等窮年咕嗶。足跡不出三里外。寧知世路之嶮巇哉。衆唯唯。又曰。國家求才待用。自維有其才。具則進。苟平平。寧坐牀頭弄稚子。無以父母之身。輕飼虎狼之口也。今第行無畏。衆羅拜曰。向者不敢啓問。今將軍活我。恩厚矣。願聞姓名。以

圖報效。客悉扶之起。舉傘扣舷曰。余亦非將軍。亦無姓名。亦不望報。吾去矣。一躍而逝。既而春闈。一舉子逢客於號舍。心訝此君能挽兩右弓。復能識丁字。真異人也。趨前問。無恙。客睨視。若不相識。亦不答。卽入號熟寢。窺其舍。鐵硯斑管各一。別無長物。初不敢呼問。客直睡一晝夜不寤。次日午晌。舉子文已畢。將繕寫。心德客。慮其沉睡。將不克終卷。欲以已餘勇買之。遂呼客。客大恚曰。豎子敗吾事。斷送會元矣。舉子踉蹌不知所對。既而客歎曰。毛生毛生。豈非命也。夫千金之璧。當首貢王廷。安能隨行逐隊。自居牛後。爲渴睡漢。擲榆哉。今以吾文與公。可獲亞名。亦不負公數千里冒險跋涉也。索紙書之。風行海湧。三藝立成。擲於舉子之前曰。吾去矣。卽持空卷投有司。稱疾而出。舉子閱其文。允稱傑構。書法亦矯健非常。嗟歎不已。因棄已作。書客文以進。果成進士第二名。耳食錄

葛衣人



葛衣人

江寧江進士之官師。止逆旅小飲。時密雪巖寒。折繇冰酒。忽見戶外一葛衣人過。顧然而長。跣足行雪中。了無寒色。江異之。前叩其姓氏。不答。又問客寒乎。亦不答。又問客飲酒乎。乃點首者再。遂引入旅舍。飲至無算。不醉復進食。食至無算。亦不飽。而終席都無一語。狀類啞啞。江愈奇之。次日將行。請客俱。搖首勿許。遂辭別。行三日至一處。葛衣人忽至。謂江曰。君見夫寬衣大笠。短棒荷燈籠。遙立道旁者乎。江曰。見之。一僧也。彼何爲。曰。今夜三鼓。飛刃取君首者。卽渠也。江膽喪伏地求救。客曰。吾在固無畏。渠果來。膏我斧矣。乃戒江熟寢勿驚。至夜半。客提僧頭。擲地上曰。莽髡無禮。吾已殺之。然亦君挾貲太重。爲渠所覲耳。江初諱之。客曰。君囊中白金若干。黃金若干。封識何狀。藏置

何所。胡乃欺也。江大驚失色。連曰唯唯。客曰。挾此何爲。江曰。欲往投某公門下。以此爲贄耳。客艷然怒曰。咄。汝固蠅營若此哉。吾目昧。誤識爾。悔不教和尙殺爾。言罷。提僧頭越屋而去。時星光黯淡。頃刻無蹤。江慙且懼。遂不復至京而返。

耳食錄

了奴姊妹



了奴姊妹

山左何生者。富而好義。嘗客金陵。徧謁同舍郎。一少年客居西室。首戴長巾。衣甚襤褸。而珠神玉貌。如好女子。見人輒扃門避去。何心儀之。投三刺。客瞰亡。始來答拜。他日窺其室。曲突無煙。客坐繩牀上。擁敗絮而已。退問主人。客何姓。何許人。亦弗之知也。乃謂稅居半載矣。值弗償。不能復館之。何歎息不已。意必避難而窮於途者。乃代爲納值。囑勿言。聞餽之金錢。周其乏。客不辭。亦不謝。無何。款其闥。則無應。入其室。無人焉。客竟去矣。牀下有青布囊。啓之。所餽錢悉在。深歎其廉。然心竊怪之。未幾。何還山左。里人誣訐其陰事。縣官索賄賂至鉅萬。始得理。家由是破。遂南遊於楚。稱貸其故舊之官湖湘者。薄有所得。旋治任經洞庭之野。忽林間逸出一巨獸。紅毛鋸齒。當途而立。勢將

搏噬。莫可逃匿。歟有女子飛騎來。錦衣弓鞬。腰劍挾弓矢。卽馬上舉足。勾獸鼻。獸狂吼而奔。女逐之絕塵而去。何雖幸得脫。而所駕馬驚於獸鞭之不肯前。不得已。返轡故道。馬乃行。日已遲暮。不及宿。獨止野廟中。不能成寐。夜深月出。起步廟門外。微颺拂面。隱隱聞笛聲。悠揚纖妙。且聽且行。笛聲止而笑聲起。則燈火爛然。甲第大闢。有攝華衣冠者。迎門外。揖何而進之。抗賓主之禮。何懷疑不測其由。乃徵其氏族。其人曰。君忘金陵西室之人與。卽我也。何審視果是。因問向者何去之密。今何遇之巧。客曰。余窮而遁去。投止於是。感君舊誼。故特相俟。何訝其預知。何唯唯。語次。聞客腕釧觸几。頻有聲。何竊左右顧。而見其冠下微露鬢梢。心愈疑而不敢詰。客笑曰。君疑我耶。日間馬上驅猛獸爲君除道者。亦我也。因探去其冠。而雲鬟見。何大驚。亟拜稱謝。呼曰。神人。女亦答拜之。曰。吾雄服遊戲人間。以貧自晦。遂不爲人識。君獨助我。故

我亦助君。適以相酬。奚足復齒。旋顧謂侍者。呼了奴出。乃十三四歲女子。頭作雙角髻。短襖窄袖。秀若雲霞。女與之語。殊隱躍。了奴曰。諾。遂拂簷而去。頃之劍聲。呖然。了奴已瞥下。反命曰。畢矣。女乃命治餐。杯盤立具。極海陸之陳。夜向晨。何不勝酒食。起辭告行。女亦不強留。然眷戀之情。溢於顏面。有長鬚奴控騎候門外。卽何所乘馬。裝資亦在。何遂別至家。家人乃言里人及縣官一夕死於盜。而並亡其首。問其時日。適何見女之夕也。始悟卽了奴所爲。愈感之。及理行篋。則益以厚贖。別一小匣。緘甚固。啓之。得小劍。長三寸許。淬利如霜雪。試削庭前樹。未至樹已斷。劃石石解。意所向擲劍。劍輒往。已復還手中。蓋飛劍也。何喜甚。寶之匣中。間出而玩之。歲餘。劍首之環脫。其夜室中如虎嘯。有白光拂牖而出。劍乃亡。何惘惘如喪者累日。時沍寒密雪。忽聞門外馬嘶聲。出視。有駿馬止焉。鞍鐙悉具。疑亡而逸者。而鬣間隱繫繡囊。解視得

蓮花一瓣。書曰。騎至卽發。並不署款識。何頗疑怪。而馬數昂首。咆哮。若勸駕之狀。試跨之。則東南而馳。絕駛。亦不知里數。既至一處。蓮花池相續如帶。及第三池上。馬止而嘶。不復行。乃見高墉袤延。立處當朱戶。戶內人語曰。至矣。戶乃闢。有小鬟招之曰。進。何徐徐步入。遽引至內。則曲室銀缸。熒熒發碧。黼帳中有呻而歎者。小鬟前白曰。至矣。則聞鈴鏘然。帳徐啓。有麗人擁衾而坐。神韻酸楚。何遽巡審視。女也。女見何。訝然色喜。已而躍然起問。奚以能來。何告以故。女顧侍者曰。此必了奴也。侍者皆點首微笑。頃之。了奴自外入。紅衫翠笠。六花滿身。鴉鬢楚楚。已勝雀翹矣。女彈其頰曰。妹子召客。何得不告我。了奴笑曰。吾爲姊病甚。趣召之。故不及闢白。女默然低首。已謂何曰。妾相天下士。每不留盼。雲翔電邁。頗亦自豪。不圖爲君纏綿至此。於是。與何爲夫婦。何以失劍告。女責之曰。吾贈君飛劍。爲君能用之。乃秘藏爲弄具乎。彼乃神

物。豈長處匣中。宜其亡耳。顧此物怪變異常。非得了奴。莫能收攝也。何固屬意了奴。乃請與之俱。女初不聽。何固請。女笑曰。察君之意。殆非爲劍也。何不能隱。以情告。女曰。吾固欲之。然事不可驟。當說之以偵其意。乃謂了奴曰。郎劍遞。是物不易馴。須妹子一往。使郎佐汝。了奴曰。妹自足了當。何以佐爲。女曰。雖然。亦使郎一覩其狀。聊試勇怯耳。了奴許諾。女竊教何曰。君與妹子求劍。見有物青色如龍者。劍也。毋怖毋却。然且僞爲怖恐者。而匿就妹子。彼爲君畏故。將不忍拒也。遂同行至萬谷之間。風聲蕭蕭。了奴顧何曰。劍在是矣。果有物長五六丈。蜿蜒於層崖之顛。了奴招以手。物卽投下。入手中。遽已縮小。依然小劍耳。何憶女教。乘其舉手。佯驚呼走。抱了奴腰作戰慄狀。了奴大笑曰。姊亦大憤憤。如此薄膽郎。何必教來。因以劍授何。何故故畏縮。不敢受。而抱持益力。了奴兩頰漸發赭。若不自持者。何凝睇送意。追懇之。遂及於亂。

及還。女戲曰。妹子嘗爲吾蹇修。吾今報稱焉。於是了奴亦歸何。了奴謂何曰。吾姊妹皆紫蘭宮捧劍侍者。與姊竊戲西圃中。拔劍對舞。誤傷守宮之鶴。故謫墮人間。使主游俠之事。遇鏡而圓。幸託於君。及瓜而代。又將去汝。此後落花明月。萬古相思。殆無相見之期矣。何大悲。二女亦泣。女謂了奴曰。妹子故善笛。今盍爲郎奏之。了奴撫笛。爲悲涼促遏之音。一時風吼霜飛。肝腸盡裂。乃投笛於地曰。離緒填胸。安有佳響。不如且已。遂大慟而別。何獨還鄉里。亦能通白猿之術。每爲人旁雪不平。或有妖憑魅祟室宅不靖者。何以劍往。立誓服。

耳食錄

游客鐵丸



游客鐵丸

聞某公言。昔曾遇游客。類三齊年少。布衫廣袖。腰繫夾袋。內貯二鐵丸。別無長物。或問丸所用。答曰。弄具耳。或延拆字者於家。問叩紛然。客至。見之曰。此亦拆字耶。衆問客能乎。曰。亦嘗學之。然不能若是。請各心識一字。余乃能測之。衆異其言。競試之。無弗符者。次至一人。客忽躊躇曰。君之所識者。天也。而字不敷。乃取筆畫形作國書阿補喀。阿補喀者。國語言天也。其人果識阿補喀。蓋欲變文以驗其術也。遂笑曰。良然。其神異如此。或曰。人苟造意。子必知之。何以待子。客曰。不知也。此特以機相觸耳。他日之郊外。逢彈鳥者數人。適有隼戾空。客使彈之。彈鳥者謝曰。高矣疾矣。非弓繳所及。客笑曰。易耳。卽袋中出鐵丸。拋之。隼應手翻墮。胸已洞矣。丸固在客掌。耳食錄。

水
先
生



水先生

順治中。虎賁某公者。延水先生傳其子。水蓋越人。年可四十餘。風貌冲藹。某休退之暇。常與晤言。頗契洽。蓋賓而友之者也。水每值三六九日。必出訪友人。積二年。某偶宿齋中。與水對榻。一夕漏下。俱寢矣。夜中某覺。見水坐燈下。身已急裝。七首照人。氣若鬼神。非復故態。乃佯寢以偵其變。俄焉門啓。割然遂去。某駭而俟之。將曙。門復啓。水至。提人首纍纍滴血。徐取藥彈之。皆縮小。盡納口中。滅燭就枕睡。某悸甚。明日。水問曰。夜來頗見否。某諱之。水笑曰。形迹旣露。敢不告公。苦闖賊寇亂。某從其副小紅狼。知其無能也。去之。賊乃恨我。誘殺我父母妻子。我方欲報之。會大兵入關。妖孛潰除。知此賊遁去。廉之數年。今始畢之。向之屢出。良爲此耳。公遇我殊厚。然不可留。乃別而去。耳食錄

逆旅少年



逆旅少年

陳孝廉奇聖。自京師之金陵制府。道遇騎使。亦往制府。勾當公事者。因同行。一日解裝逆旅。則北寢已有宿客。遂止東偏。頃見少年自外入。深笠寬衣。面掩於笠。不甚可辨。卽北寢客也。輒召主人。使治具待客。必豐必潔。主人諾去。少年入北寢。曲肱支頤。凝燈宴坐。陳亦遂就榻。而騎使素好選事。秣馬儲芻已。潛往窺之。伏於梁間。旅柝再鳴。歛見一物飛入。狀類鵝鴨。乃覺室中鞳鞳。勢若鬥兵。燈影散亂。莫可端倪。頃之。有一人踣地。乃胖僧也。少年揮劍擬之。曰。若不自量。欲犯乃公耶。僧固稱不敢。卑辭乞命。少年曰。若雖不競。然亦吾屬也。羽翼可任。安肯相逼。遂釋之。起復仰視屋間。謂騎使曰。君爲壁上觀。亦殊勇敢。宜下相見。騎使方怖。聞言駭甚。趨下拜伏。少年並攜就坐。呼主人將

酒肴來。相與飛觴大嚼。少年與僧語。騎使略不解。危坐傾聽而已。酒酣。少年謂僧曰。吾有尺書寄於某所。能爲我鱗鴻乎。僧曰。能。少年又曰。三日後會我某山。能不愆期乎。僧曰。謹如命。少年卽袖中出書付僧。僧便乞辭。復如鷗鶚飛出。騎使亦謝出。往臥東偏。天明迹之。北寢空矣。叩主人亦弗知也。以狀語陳。相與嗟異。計僧所寄書。及所期之地。殆三四千里。騎使又言少年形貌玉立。美如曲逆云。耳食錄

末坐客




末坐客

有王黃鬚子者。以鬚黃得名。自詡劍仙。嘗會飲貴家某公宅中。譔耀四座。遞叩諸客所能。莫不謙讓。王意益肆。末坐一客。儻備癡。衣冠了烏。王頗輕之。乃揶揄曰。公辱在婪尾。得毋善飯乎。抑有他長。客笑曰。僕誠不能與諸君子比數。然聞君論劍。頗觸鄙好。願各爲戲劇。博諸君子歡。王掀髯作色曰。云何。客曰。劍之爲用。上倚星漢。下披泉壤。旁行四極。割蛟鱷於不測之淵。剪妖魅於幽暗之叢。雖脫兔逸材。疾隼赴霄。縱鏢飛鋒。罔有遺近。今第試其易者。請伺飛鳥而刺之。王心難之。適已日暮。乃諉曰。陽烏匿矣。羽族息矣。何天有鳥。尙來迎吾刃者乎。客曰。若是且已。盍試登高。爲二項之舞。一決楚漢。王又辭曰。休矣休矣。星月不暉。燭燼不輝。仰不瞻山。俯不察地。翼手可登。而角我技。

客指主人廳事曰。崇墉巍巍。飛甍冠之。上探雲霞。嵩華可齊。顧不高耶。請灼爾目。趨爾足。僕雖跛臂。願導先路。於是褰袖離席。挾王以出。如提嬰孺。履牆緣棋。如步康衢。徑跨簷牙。升於屋脊。坐王於鴟吻之上。而撫之曰。此地平曠。聊可棲息。君請匡坐。僕便來迎。言已復下。神氣灑然。堂下觀者。無不色飛口哆。嘖嘖稱神。客便索酒。連罄數觥。頽然就舍。主人命支梯檣架。閨擾終宵。王始得下。天明視客。已豹隱矣。王甚慙。主人甚悔。海內奇士。交臂失之。耳食錄

柳生



續劍俠傳 卷三

香山鄭官應陶齋輯

柳生

黃明府謙六攝篆東阿。延紹興錢君主刑名。對房柳姓。陝人。極樸誠。每夜靜。即閉門坐。錢以其本訥。試窺之。見柳生背燈面壁。手一篋。語喃喃不可聞。次夕亦然。異之。伺柳出。潛往啓篋。但見白光丈餘。冲屋飛去。錢駭絕。自承。柳曰。余劍客也。有讎家在此。將甘心焉。不意爲君所窺。劍旣出匣。必傷數十人而後已。首將在子。錢伏地求救。謝不能。錢哀不已。乃曰。速備巨缸七口。白雄雞六隻來。於是疊缸爲七層。層置一雞。而覆錢於底。四更許。忽霹靂一聲。柳呼曰。大難已過。可出矣。起視則六缸皆碎。雞悉無首。方詣柳謝。已不知何往矣。

衛女



衛女

卽墨褚生。善畫能文。游大梁。中丞某公與其父同年。以年家子往謁。中丞善其才。爲之揄揚。遂擅名豫中。迎母與妻家焉。鄰衛媪者。夫官靈寶縣尉。不得於觀察某。假事漉職。斃獄中。眷屬無歸。一女豔麗。與褚妻相過從。衛常斷炊。母令褚分卹之。未幾。衛媪死。女益鬻無所依。褚母養之於家。女紅精絕。通書史。知大義。付以家事。內外井井。沈默寡言。相處年餘。未嘗諧笑。母偶爲之議姻。以母喪未除爲辭。無何。中丞爲褚納資。得雲南臨江尉。褚母欲偕女赴任。女不可。方爲篝一棲止。至夜。門戶不啓。忽失所在。匿中得一函云。撫育恩深。義當終從。惟父寃未雪。不忍舍近趨遠。今且暫別。埋首夷門。酬恩當有日耳。褚赴滇。以畫受知制府。檄使開礦。宦橐獲豐。乞養歸。以母老塗長。聘壯士護

送。至黔界。止宿逆旅。見竹輿舁女至。各忻慰。詰所自來。女曰。大冤未雪。圖所以報母耳。同行至洞庭。夜泊荒岸。盜艘數十駛至。壯士出鬪。悉被殺。投屍湖中。褚母子不知所爲。女忽短衣窄袖。卓立船頭。但見白光盤旋。盜首紛墮。餘衆駭逸。女一招手。則三寸許匕首耳。褚母感謝。並訝何人授此絕技。曰。自父冤死。切念雪讎。每夜向空泣禱。淚盡繼之以血。忽有蓬首婦。以青巾裹頭。願投服役。遂留之。婦乘機以劍術相授。三年而成。問爲誰。則聶隱娘也。女送母至卽墨境。曰。前皆坦途。可無虞矣。願母善自珍重。兒去矣。燿然而逝。釋編

袁客



袁客

烏程卞某。粗涉詩書。而性好拳勇。善擊刺。依其戚某中丞於湖南。嘗爲中丞送萬金返浙。阻風鄱湖。同泊有巨舟。類貴人。儀從甚夥。一少年坐小舟。著白袷衣。貌甚清羸。隔舟攀談。吐屬溫雅。彼此通姓名鄉籍。知客袁氏。邀卞過小舟飲。謂卞曰。君以孑然挾重資行遠道。不虞江湖暴客耶。卞腰間出利刃斫案曰。賴此君耳。袁接視。殊不介意。袖出一小劍。削刃脆如瓜壺。卞不覺失色。袁曰。勿駭。我非害君者。巨艦乃綠林之雄耳。艇子非一日。君榜人亦其同類。風順揚帆。卽下手矣。卞長跪求救。袁取筆。以寸紙作數畫付之曰。事急焚此。當相救。卞感謝。持之回舟。舟子卽解纜去。入夜。榜人大呼寇至。一艤艫上流箭激而來。槍礮不絕聲。卞急焚符。一物如飛鳥落。則袁也。黑衣紅束額。持七

首立。榜人舞刀入。揮劍殪之。盜繼登。紛紛墮水死。遂駭逸。事既解。袁謂卞曰。前途伏戎正多。當護汝行。遂留舟中。入江南境。始別去。翼關

王 姓 客



王姓客

江南方別駕鳴夏。雅愛手談。康熙初。應楚藩伍公格幕。偶訪友城外。值友與客弈。客布局甚高。詢其氏曰。王姓。與之談。頗風雅。遂成傾蓋交。延至署。行裝華好。而恂恂若書生。似無他能者。人未之奇也。一日。署外火。王隨衆往觀。火延。援例某監司家。燄勢迅猛。其兩子樓居不得出。監司號於衆曰。有能拯我子者。酬千金。王聞之。聳身躍入。捷如鷹隼。須臾負兩子下。監司喜極。謝曰。感君大惠。已活我子。箱篋中尙有部照一紙。係某他日服官券。不識猶肯爲力否。王復騰蹕直上。挾數箱。冒烈焰飛出。方其初登。人第見白馬往來。烟焰中。比出。樓已灰燼。而王神色自若也。衆始知爲非常人。競求其術。王曰。城東數里外。洪山之麓。有寶通寺。深宏幽靜。盍具饌餉我。藉陳薄技。伍公乃擇吉張

帷於廟。賓朋畢集。酬酢移時。王袖中出鉛丸二。謂衆曰。諸君欲觀此耶。卽拋擲空際。旋有白光兩道。各長丈餘。上下盤旋。矯若游龍。而寒氣侵人。不可逼視。忽聞崩塌聲。牆宇震動。殿東南有銀杏一株。大數圍。嶄然中入矣。衆相顧驚愕。白光倏沒。王頓失所在。遺素紙一幅。署曰。與方公交半載。囊中物留以誌別。計其物可值數千緡。秋燈叢話

續劍俠傳 卷三 王姓客

空空兒



空空兒

乾隆時。兩江制府黃太保巡邊至鎮江。舟泊京口。忽失其項上所挂數珠。大驚。傳地方著令嚴緝。限一月內交出。府縣受命。退卽飭役各處緝訪。了無踪影。無何。限期已迫。追比俱窮。令某焦思無策。乃離署微行。密訪數日。至句曲山後。遇一韶麗女子。衣絳綃衣。弓鞋窄袖。行絕壁間。採女貞於樹下。上如飛鳥。異之。伺其歸。尾至溪邊。入一洞穴。某亦蹠入。其中大可數畝。而幽折虵旋。迥非人境。穴將盡。有茅屋數間。門外檜籬縈繞。一老嫗滌器於竈。見某訝曰。是非某官耶。何以至此。某前揖具道來意。嫗微笑曰。哦。想又是我女與貴上人作劇耳。此女憨態未改。致貴官惶急至此。自當懲之。但此時不知何往。請姑歸。明日當令送還貴官。於午後至報恩寺塔頂攜取可也。某悚然敬諾而

出。疾馳稟太保。太保不勝駭異。次日命副將某率兵往環塔。彀弓注矢以待。至日中。衆目睽睽。仰注塔上。忽見一道紅光。譬如飛電。而數珠已挂於頂。一時萬弩俱發。眇然如捕風影焉。於是令健卒梯而登。取珠下。珠上繫書一封。題曰空空兒手緘。以呈太保。拆視大略言其蒞任以來。挾威以擾士民。挾術以欺君上。挾勢以辱長吏。以諷察縱武弁。以羅織爲腹心。以凌侮稱孤立。濟貪以酷。行詐以權。身荷封疆之任。心懷鬼蜮之謀。一方徧罹荼毒。而紳士無所控。科道不敢糾。故取公此物。聊用示警。若不速圖悛改。仍蹈前愆。卽當取公首級。以爲爲大吏者戒云云。太保讀畢。毛骨俱悚。其貪暴從此稍戢焉。埋

憂集

續劍俠傳

卷三

空空兒

九八

珠兒



續劍俠傳 卷三 珠兒

九九

珠兒



珠兒者。隱其姓名。山右太原人也。母夢神人授赤珠一顆而生。因名珠兒。十歲就蒙師學。忽失去。八九年復還。人叩以所往。語隱約。時母死。父爲豪家所賊。珠兒殺其讎於市。攜首詣有司。有司論以大辟。珠兒從獄中遁之浙東。與豪士姜堯善。數年歸省邱隴。姜亦南遊台雁。值閩變。賊帥聞姜材。欲官之。姜曰。燕雀處堂。不知禍敗。而欲人陪戮西市。夫誰肯。賊怒。挈姜於軍中曰。俟吾下兩浙。定江東。平中原。然後殺豎儒。珠兒至浙。不見姜。傳言姜往京師。乃至京不值。將復訪於浙。有吳生者。山陰望族也。父入某撫軍幕。甚寵信。生往省父。父以黃白物付之歸。道經都門。阻於雪。假館宣武門外。見美少年披羊裘。策驢來投宿。呼主人索酒一斗。堯一肩。割肉烙火上。且飲且嚼。須臾過半。吳

生異之。從容詢其姓名。曰：予珠兒也。問其行。曰：有故人在浙，將訪之。生曰：吾浙人，明日當發。聯轡行可乎？曰：不可。吾騎日行八百里，非君騎可及。且吾前途期會一客，不能與君俱。倘中道有逗留，君兼程進，當相及。吾於旅舍壁間畫一鷹，下識其日。卽知吾所過也。相與共飲。及明雪霽，出彰義門里許。珠兒於驢背拱手曰：吾先行矣。策驢如飛，轉瞬失所在。生十日抵高唐，見旅舍壁間有畫鷹，讀其識，卽出都之夕。詢之主人云：畫鷹客期人於此，兩宿不至。遂去。抵淮陰，遇於酒家樓上，呼酒共醉。生心羨其騎，有欲得之色。明旦，珠兒曰：君愛吾驢，請易君馬。生喜易之。及就道，驢殊蹇緩。珠兒於馬上語生曰：汝不善乘，請先驅於蜀岡待。遂加策去如電。生惘然。至蜀岡，而珠兒已俟兩宿矣。因告生曰：行道遲疾，在人不在騎。苟得其道，雖疲乘可致千里。况良騎乎？於是生知其有術，懇以師事。珠兒諾之。旣渡江，聞姜生陷賊中，曰：吾將急友難。

子姑同。上元後。待我於家。馳去入賊壘。脫姜。賊無知者。吳生返山陰。日引頸望。期及。有稽姓來致珠兒書。封甚密。啓視之。蓋劍術也。其法用鉛盒圍八寸。中置小鉛劍二。鉛丸二。封以六甲靈篆。誦咒吞符。凡四十九日。術可成。生執書喜躍。稽姓去。乃構靜室。築壇備器具。甲子入壇行其法。至四十二日。聞盒中有聲如蠅鳴。法愈勤。聲愈宏。至四十八日。怪風起。盒中作金鼓聲。旋發大礮數十響。牆垣傾圮。烈焰蔽空。壇上諸物成灰燼。生爲火所薄。身如炭。入室不能言。嚙其口。播其首。昏臥三日。變爲狂。奔山顛。舉巨石。拔大木。如是六七日。愈。耳畔時聞金鼓聲。適其父挾重資回。召黃冠設醮懺無驗。及撫軍事敗。父駭且愧。耳畔亦漸聞金鼓聲。發狂如其子。如是六七日。愈。子復發狂。如其父。如是六七日。亦愈。期年。父子疾俱作。子操杵而舞。父舉火而焚。喪其貲過半。父狂死。子愈。乃矍然曰。其珠兒之侮我乎。抑孽由自作耳。歲暮葬父訖。盡

散其貲於親戚鄉黨之貧者。挾妻子入山。道逢二客策驢來。其一披羊裘。遙呼生曰。吳生無恙。今而後可以授吾術矣。夢華雜志

續劍俠傳 卷三 珠兒



黃瘦生

諸少年赴江寧試。寓王府塘之東。秋月皎潔。門臨塘水。有大石正方。可容五六人。羣置酒饌於上。爲夜飲。漏下三鼓。談笑甚懽。聞擊柝聲近。一老翁偃僂而來。止足睨視。有流涎意。一少年曰。爾欲飲乎。酌以巨觥。翁吸盡坐。有談劍俠傳者。笑曰。相公等讀書人。所談皆書本上事。不足信。衆曰。然則爾有所見乎。盍言之。當飲汝。曰。予老矣。言之亦無害。予家保定。弟兄四人。皆綠林之雄。第三兄藝尤絕。縱身直上。可十數丈。貼地如落葉。以二指捻屋椽懸而行。入窗櫺無聲。同行刳於北地。一日。有車馱馳道上。載貲巨萬。一黃瘦生跨健騾衛之。行念攫取之。可贍一生。後當不復爲此。隨行數日。無下手處。至某店中。夜聞黃瘦生呼其役夫曰。起。此地有暴客。將爲不善。今日當兼程。予兄弟意

不捨。是日行百五六十里。日暮曠野無人跡。遙見黃瘦生口鞭梢指道旁荒祠。趨車駛入。閉寺門。弟兄喜甚。以爲此籠中物也。屏息牆外。約一更許。擬排闥入。予三兄曰。黃瘦生非善良。恐有備。予試覘之。躍而入。良久不見出。長兄入如之。次兄入亦如之。聽村雞號矣。予心搖搖如旌。躍至牆巔。以兩手據之。俯而瞰。時月光西斜。見一人背門坐。前有物。彷彿神案。案上有香正爇。凝睇未已。香上烟忽四散。瞥見一物。如鷹隼來撲。予大駭墜於地。遂昏絕。天明稍開目。視血淋漓徧身。野風吹頭上。痛不可忍。撫之。喪予頂。強起行數步。祠門洞開。虛無人。三尸藉於地。身首離焉。予魂魄飛越。忍痛急行。竄入江南境。將爲僧。寺無肯留者。乞食數年。爲更夫。又十餘年矣。指其顛曰。此故創也。衆起驗之。頂削平。形如半匏。咸驚異。飲以酒。盡十數觥而去。及明訪之。杳矣。華夢

周
櫟
園
姬



周櫟園姬

祥符周櫟園先生。移家白下。駐節青溪。與一姬共甘苦者七載。姬性豪壯。時北海烽燧載道。姬隨櫟園。曾策單騎數百里。青陽城上。矢死登陴。一夕。挾匕首。飛身入賊營。殲厥巨魁。而門戶高扃。人都不覺。彷彿如紅線之到田承嗣宅中。取黃金盒而返。亦大異事。姬嘗自稱前生是金粟如來弟子。再生世界。十五歲。卽當謝世。後已過期。乃一朝示疾不起。囑櫟園曰。妾爲情累。貪生七年。今須祝髮。以比邱尼葬我。君之城上詩。并妾所和詩。置諸左。茗椀古墨。及素所佩刀。置諸右。覆以大士像。左手持念珠。右手握君名字印章。仗佛力解脫。非願再世。作臂上環也。語淒切不忍聞。卒後。悉從之。年才二十有二。鏡花

道人



道人

何配耀。湖南長沙人。嘗遊江蘇。寓虎邱山後古花神廟。廟距山半里許。不時至山閒眺。每見山上游女如雲。粉白黛綠。豔之。有素妝者年約二十餘。尤嫵娜異常。何目注神移。女亦微睨。意若有所屬。何益心蕩尾之。已乘船飛棹而逝。莫可踪跡。歸寓。心神恍惚。夜不能寐。遂挑燈靜坐。聞叩門聲。詢之。曰。卽日間所遇於虎邱者。知君多情。故私奔以伴幽寂耳。何思偶爾邂逅。胡由知此。度必鬼怪。懼不敢納。女再三訴陳。情詞纏綿。惻惻動人。何終不答。久之聲寂。何亦就枕。輾轉之際。疑信參半。甫交睫。而麗人至。狎褻備至。及鷄三唱。始知爲夢。猶以日之所思。積而爲夢。自解。自是無夜不夢。精神日憊。漸不能支。或白晝時來時去。相與調笑。浸假而如影隨形。不復暫離。百計驅之不去也。忽

一道人形骨立。衣百結。曳屨負劍。經廟門過。何適倚門而立。道人顧何訝曰。君人也耶。胡陽氣消盡。與鬼爲鄰耶。何以實告。道人點頷曰。是矣。解劍授何。曰。持此置牀頭。可除。倘劍鳴。則急持。毋令飛去。何唯唯受命。視其劍。則蒺藜。歸置牀頭。麗人卽不復在側。精神亦覺稍爽。至夜靜。聞簾外有女子聲。歌唱而來。劍忽動。蒺藜倏化爲龍。一線紅光。穿簾而出。劍頓烟灼。吐光射人眼。不敢逼視。鏗然有聲。何驚極不暇持。瞥然飛騰如疾矢馳去。是夜何得安枕。惟以失劍爲慮。次日。道人至索劍。何長跪謝罪。道人曰。此戰國時馮先生劍也。是劍治魔。不可以數計。君今遇魔。故奉以相治耳。但君之魔。以蒺藜縛之。足矣。不須斬也。立門外。以手向空中招之。其劍如鳥飛翔。戛然止前。穢氣撲人。道人曰。污我劍矣。又費一番鑄冶也。遂將劍置地上。口中吐火。若水銀瀉地。頃刻火堆數尺。不可嚮邇。蒺藜固不焦。而劍已如金在冶矣。乃於火中出劍。

以拳敲擊之。或於掌上磨礪之。治已復就火煨。如是者三。視其刃若新發於
礪。遂仍吸火入口。須臾火盡。地已焦赤。道人曰。合與君有緣。因來施治。但魔
雖去。而心氣已耗散矣。索紙七張。每紙上各畫一圈。其大者可徑尺。以次疊
小。至如一粒粟。曰。先以大圈粘壁上。終日兀對。令心不出圈外。七日內心氣
可足。若功力不懈。七圈皆用。效當自知。言已負劍去。何如法行之。至四十九
日。心地忽然明徹。飄然而去。不知所終。或曰。從道人遊也。志異續編

童之杰



童之杰

武生童之杰。濠州人。嘗蓄一利劍。自云能斬鬼狐。人固未之信。某年秋。負之行山東道上。旅人有詢者。輒津津道之。且云。吾持此刃。雖不能學萬人敵。然遇魔鬼邪妖。不難一一斷之。彼區區誅軍斬將者。猶是人間鈍器耳。言之數數。卽有好奇者。欲試其能。因先與結交。行止皆共。時濟上有巨宍所居宅第。爲妖所據。曠之而遷於邑中。其人深知之。一日。令宿其地。乃給童曰。溽暑猶蒸。旅邸人滿。有一清涼國。君能從我遊乎。童詢焉。則曰。知交有別墅。實在於是。倘偕訪之。今夕東道主有所在矣。童欣然從之。並跡而前。至則天已嚮晦。其人導以往。戶猶未閉。闚其無人。蓋巨家緣有怪異。知無敢入者。遂不慎筦鑰也。兩人襍被徑入。甫及中門。其人佯驚曰。何灑婦亦無一二。君姑處此。待

予往左近覓之。童視第中頗修整。故亦不疑。且恃其武勇。慨然曰。諾。其人卽趨出至外。遽闔其扉。且以革帶繫雙鐙。諒童無能飛越。喜笑而去。童久俟不至。心竊訝之。欲出。則門已扃。頓悟曰。若人殆欲試我術也。幸有劍在。予何懼焉。於是卽庭側一室。拂其塵榻而處。時已昏暝。亦不遑深入。按劍良久。寂無見聞。遂倦而思寢。甫安枕。窸窣有聲。窗牖故無片紙。伏而窺覘。淡月之下。見一人長僅尺餘。侏儒肥矮。往來巡堦而走。狀似狐。因厲聲叱之。倏然不見。童遂以爲無足虞。弛然復臥。俄而火光頓熾。可鑒鬚眉。有異物高與簷等。面瓜皮。雙眸如盃。灼灼然。火光卽從此出。周身皆綠臺。約長數寸。甚可怖畏。童不覺股栗。強挈其鋒。虛聲相向。物笑曰。此劍儘足割雞。奈何大言欺人耶。其音如鴉。響震屋宇。童之劍早已墜地。正倉皇間。忽聞環珮聲。物竟斂迹。童因定性視之。遙見紗籠數對。出自庭後。比及臥室前。則一中年小婦。靚妝衽。導

以小鬟十數。咸衣紅紫。童心詫妖異。屏息無言。婦人排闥入室。命小鬟以燭照之。微哂曰。看竹亦問主人。何擅作入幕之賓。無怪乎廝養不容也。言訖北面就坐。呼童以禮相見。童既無能適。強起而揖之。潛睨其容。黛綠粉白。猶存風韻。因竊計巨鬼畏此。此必其中巨擘。予受此劍。本未一試。頃因氣餒。致爲鬼所擲。揄今值孱弱。猶不用武。豈真束手待斃乎。見婦人指揮從婢。似將不利於己。意殊莫測。乃俯掇其劍。挺而刺之。婦人忽迴眸一笑曰。汝猶以劍俠自居耶。予以好生。不戕汝命。且欲講濟世之術。汝乃包藏禍心。反以予試此刃。是誠不可救藥者矣。汝既有利器。請斷予首。倘不能效。弗可活也。言次側身向童。命其嘗試。童懼復棄其劍。伏地曰。予不敢矣。婦人又笑曰。孺子尙知分量。似可教也。乃令起坐與語曰。予實紅線之鬼。伸於劍。非若子之碌碌者。因此地鬼狐爲祟。特來居之。怪皆遠遁。向之誣子者。皆子之僕隸爲之。非真

妖也。而主人不知予仙。猶以爲怪。遂亦久無。適在後庭。聞僕言。子有重寶。而其氣不揚。故宵行而來。將授子以異術。他哉。童聞言大喜。長跪請教。欲求爲師。婦人命取所擲之劍。拂拭再三。謂之曰。此道家蕩魔之具。非吾輩所用者。故須人力。始克奏功。若吾劍之飛騰變化。則行之無阻矣。雖然。子實負此劍。非劍之負子。吾授子口訣。再以符水煮是劍。則天下之魔。不難盡蕩耳。童益踊躍請教。婦人遂言曰。天心正大。吾法正直。蕩滌邪穢。肅清一世。授訖。卽令小鬟持劍去。以某符和某水煮之。以光起爲度。且謂童曰。劍非不利。但遭此塵埃。亦不免鈍矣。因與童坐語。歷言劍俠行事。並戒童以正心濟物。不然。劍雖通靈。其爲寶也幾何。童一一敬諾。又許時。婢以劍出。則精光迸露。非復向之黯淡無華。童遂再拜。祇受。婦人又叮囑數言。始返內。時已漏下五鼓。童少寐。天已侵晨。亟起整衣。將詣庭辭謝。而小鬟已出。又以一革囊相

付曰。夫人有命。人神路殊。不宜數數相見。君持此囊去。盡收天壤魔妖。十年後始可尋晤於武當山。彼時再傾囊細敘也。童又拜受。小鬟卽入。童甫出。給之者。早俟於門。笑而詢之曰。此中頗安樂否。童心甚悲。然遵正直之教。不敢諱。爲緬述之。未曰。子實殺我。而予以劍。賴子以神。恩怨可以兩忘矣。遂別去。不再與言。其人亦疑信參半。嗣聞童在江右。頗著神奇。且出家爲道士。代人驅遣。不受一錢。始爲之駭異。余在邗江時。曾聞童之神術奇跡甚多。姑舉其一二。卽足憎人。揚州有一婦。初患瘵疾。旣而夢與鬼交。其鬼面目臃腫。毫無血色。且體冷如冰。每至。婦卽沉頓。頗不可當。其家延童祛之。童詰其形狀。笑曰。此一覆沒之鬼也。乃不入婦室。攜衆直至江干。夜深鬼果出。童突前擒之。刪剝剖剝。流水滿地。其臭不可聞。相偕者皆掩鼻。童遂納之於囊。鬼猶嘖嘖作響。荷之而行。婦始安。半年而愈。又某縣富家女。亦爲狐祟。晝則白身臥

閨中。夜始凝妝以起。侍兒窺之。都無所見。惟衾枕時有長毫數十莖。則狐之所遺也。童聞之。佩劍而往。至卽於富家門側。拔劍揮之。應手而到。得一狐。長近三尺。血殷然已垂斃。童乃剖狐之心。用以療女病。良已。仍以囊貯此狐。徐徐而出。人視其囊。約二尺。盛諸異物。無不包容。不禁咋舌駭歎。童旣爲黃冠。不歸故里。至戊辰歲。作武當之遊。遂去不復返。

螢管異草

續劍俠傳 卷三 童之杰

河海客



河海客

鉅鹿某公官總憲。有權勢。公子某好蓄姬妾。幹僕四出覓佳麗。恆晝見而宵劫。人畏其勢。不敢訟。訟亦不直。於是人咸相戒。凡婦女勿倚閭。聞公子出。雖中年婦亦必掩扉避。嘗有外來卜者。賃居尼庵。攜一女。年未笄。有殊色。一日。公子涉蘭若。見女悅之。謂尼曰。卜者女可使入府。當予以金。不然毀汝庵。鞭汝死。尼唯唯。公子去。尼以告卜者。卜者曰。我女豈爲人婢妾哉。尼曰。汝女得侍公子卽貴矣。卜者不答。尼又曰。汝身無羽翼。旣來此。雖欲不從。其能脫乎。卜者厲聲曰。伊父爲官。當知律法。敢強奪民間女子耶。尼曰。必不欲。無貽後悔。卽使人白公子。公子命健僕二十。驟來劫女。卜者出阻。羣僕鞭箠交下。風捲雲馳。霎時劫去。卜者蹶然從地起。頓足詈曰。莫謂而公無力也。必與我爲

仇定有以報。遂去。明年春。公子初度日。賓客雲集。筵宴方張。闈者進報。有髯大夫自稱河海客。探知公子誕辰。特來祝嘏。公子卽命入。客儀容甚偉。阜衣廣袖。青絹蒙首。大步至庭。後隨二童子。年皆十五六。各負一劍。最後一垂髻女。姿容絕麗。衣裘花繁。袖碧羅衫。淺紅吳綾褲。微露紫綃履。細小若菱角。腰圍繡帶。下垂過膝。手提一筐。內盛絳桃已滿。客向上長揖曰。適從海外來。採得此桃。特爲公子壽。時在二月初旬。桃尙未花。衆皆稱異。分食之。味甚甘美。真異種也。而公子見進桃女。豔又不禁神移心蕩。私念江湖女耳。餌以金。諒無不諧。否則俟其去而要於途。亦几上肉也。因問客曰。此女與汝何稱。曰。小女子也。問何名。曰。女子名何必上聞貴客。問年幾何。客亦不答。顧左右曰。來有時矣。何不賜飲饌。公子遂命設席於庭。客南向坐。二童子東西。女下坐。恣意飲噉。旁若無人。食畢復請曰。醉飽矣。并乞一席地。宵宿於此。旦卽行也。公

子令設臥榻於中門內。頃之賓朋盡散。公子入室將寢矣。忽焉有聲如風。門環響處。扉已洞闢。二童瞥然若驚燕入室。挾公子疾行。有二侍女欲隨。一童以指按其肩曰。止。則皆呆立不動。公子至外廳。見燭光下。髯客高坐。目懾公子。子言曰。余本越人。幼學劍於太華山。術既成。卽遨遊海內。專理人間不平事。今聞汝父子惡稔已極。特來除之。公子震恐。伏地乞命。不敢仰視。一童前請曰。殺耶。抑剗諸。客曰。伊父貪虐。不久當伏法。渠雖淫。罪猶不至是。去其淫具可矣。童應聲揮劍。袴破血濺滿地。公子旣悶絕。遂不省以後事。厥明日已高。府內外猶寂。鄰里跡見其異。以聞於官。驗時除救。治公子外。而闔府內外百餘人。或立或坐。或跪或臥。皆瞠目不語。如木偶然。方駭異間。一吏見廳案上有字大書曰。公子不法。本當殺却。今姑從寬。去勢留命。另行書婢僕肢廢。飲木瓜酒可療。乃如所言。治之則皆愈。檢點府中。不少一人一物。惟卜者女不

知下落矣。公子臥病年餘。始能步履。未幾總憲坐行賕免。田園皆籍沒。愧憤而死。公子至無立錫地。棲僧寺以終云。對山書屋墨餘錄


續劍俠傳

卷三

河海客

一一八

余
客



續劍俠傳 卷四

香山鄭官應陶齋輯

余客

車夫鍋五。山東之黃縣人。在都中拉短車。從未至他省。偶遇士人。曰余姓。福山人。與論價。云將之江南。鍋以不識路。未即允。余曰。但遵大道行。我曾知之。鍋欲回店結帳。余曰。勿須爾。行則行耳。余上車。行甚速。鍋亦不知其然。出都門。至逆旅。鍋問何無行李。余曰。在前途。鍋索錢。予銀一錠。次日天明。已易地。鍋未知車何以駕。門何以出也。如此已數程。鍋識字。見驛站似河南境。以問余。曰。但前行。無多言。余車中一無事。日弄二鐵丸。如彈子大。有時塞鼻孔中。下垂若筆。幹長不及尺。又數日。鍋大惑。每住宿。酒食紛列。騾之草料亦豐足。

從無人向索錢。以問余。曰。後再算。又數日。大水湯湯。岸上肆樓櫺比。帆檣如林。更不知爲何地矣。余謂曰。明日卽渡江。只以二騾行。寄車旅店中。同時仍以取用。舟中如遇警。無恐也。鍋唯唯聽其所爲。果登舟。鍋暈甚。將抵岸。上遊來一船。執刀者十餘人。呼余若欲得甘心者。余不理會。從容驅騾行。一手攜鍋走。驚悸中。只見四圍如電繞。白光數十道。上下圓轉。無少停。至日晡。余問飢渴。鍋亦億不可支。下騾坐石上。出蒸餅乾肉以食。不知何自來。謂之曰。賊子送盤纏來。無所用。悉以奉贈。因於騾上取一囊。有銀廿餘錠。令檢點收存。并告曰。途中如有事。毋懼。亦毋言。只堅守二騾。勿令逸去。少遲。各騎一騾。行昏黑中。更不知是何路徑。惟聞風聲樹聲。與騾蹄蹴踏聲。至晌午。抵一村。似在深山中。男女十數人。皆白衣冠。伏地哭迎。或相抱持。迤邐十餘里。止一門中。堂停一棺。白衣冠者。拒不令入。余怒甚。出二鐵鞭揮且行。至堂上。拍棺大

哭。手提一幼孩。白衣冠者與爭奪。余置孩案上。取胸臆一物出。擲棺前。血淋漓。拋尸屋上。舉室辟易。不敢前。鄰家皆閉門。無一人觀者。少定。驅白衣冠者。悉入內。余出門。指二樹與鍋共拔之。去其枝幹夾棺。馱騾背令急行。至山下。擡棺路旁。屬少候。余復回。鍋遙望之。山中火起。樹木亦延燒。余返。扶棺行。途中問車騾價甚悉。至江邊。舟人相助上下。船登岸後。騾行稍緩。不數十里。至店中。主人若先知者。卸棺縛車中。按站行。余一路不言笑。亦未見其易錢。而資斧不乏。廿餘日入山東界。鍋知去黃縣不遠。一日過辛家店。萬山叢雜。行人稀少。歇大樹下。余謂曰。相處數十日。同行數千里。可謂相好矣。今將到家。無勞伴送。但車騾不能還。價值短少。如命相償。鍋私忖此人可交結之。因答曰。同鄉切近。車騾儘可用。前承厚費。實已過之。勿須較量。余笑曰。真大解事。相君之面。十年內無大財氣。今餘薄資。亦以見予。回家守田畝。卅歲後再出。

謀事。後會正有期也。至僕此一舉。亦勿輕以語人。速去速去。不可回頭。又於腰間取銀一包付之。鍋叩頭謝。尚欲有言。而風沙蔽日。微聞車行鞦韆。間偶回顧。但見白光二道。閃爍射人。急飛步前行。及暮抵家中。合計其銀二百餘兩。足敷車驟原價。此道光中幾年事。至咸豐初。鍋五又出門。方以告人。正不知余姓俠客也。劍仙也。惜未問其名字。當訪於崑崙之杳間。見聞隨筆

續劍俠傳 卷四 余客

俠
女
子



俠女子

武昌梁芷香。武世家也。其父元興。習少林術。以拳棒名天下。弟子出梁門者。湖以北號稱無敵。至梁君不樂習武。曰劍一人敵。不足學也。乃棄而學文。弱冠遊庠。文名噪甚。每一文出。老宿學皆斂手退避。自歎弗如。己卯冬間。梁君偕友公車北上。路經濟境。車夫以貪行失道。時已薄晚。荒林曠野。杳無人居。同伴罔不惴惴心悸。忽聞林叢中有鳴鏑聲。一騎至前。一健男子年可二十許。紅巾裹首。狀頗不惡。向同人曰。車中物可盡留下。性命不汝傷也。同人色戰毛戴。卽欲傾篋以獻。梁獨從容前笑曰。汝等共有幾人。何不畏孔耶。男子不答。控弦發矢。竟擬梁驟若飛雨。梁挾之以指。曰技止此乎。三發三接。男子知不可敵。策騎而奔。梁還射一矢。斃其馬。男子仰隕於地。梁曰。汝尙綠林鼠

輩何足與較。是晚卽命車夫傍林露宿。車上懸一紅燈。將坐以達旦。頃之聞有飛騎驟至。衆又齒擊不止。梁曰。無妨。乃下車。立於道旁迎之。及至前。乃一十七八嬌弱女子也。容態婀娜。若不勝衣。女子詢梁曰。爾中誰有手段者。可來前一角優劣。梁曰。可。盡其生平伎倆。連發九矢。若貫珠。然女子毫不驚怖。盡以手接。最後一矢。若爲不見。待至。略張櫻口以銜之。梁大駭。乃於車中持鐵棍來鬥。女手無寸刃。但啓上衣。露一革囊。飛出三寸許匕首。光熒若月。倏過處徑截鐵棍爲兩。火星迸注。梁但見匕首在其左右。盤旋欲下。寒凜毛髮。自知不敵。亟伏地曰。願盡獻所有以贖命。於是各人行行李皆陳女前。女吹角鳴鳴。賊衆羣至。將諸物捆載而去。去不須臾。女子復返曰。君非梁元興之子乎。梁曰。是也。女曰。然則吾師兄也。頃者冒犯尊嚴。幸勿罪責。卽呼衆將物付還。并贖梁百金。翌晨護之出境。惜梁中餒。未詢女子爲何人。女子臨別時約

梁於旋轅時至其家。當有所贈。梁是歲登第留京。後竟不往。女子姓名不傳。
良可惜也。靈窟謠言

柳南



柳南

太倉吳雲巖。名諸生也。爲人慷慨負大志。肯急人之難。人皆以郭解目之。偶遊武昌。於市中見一男子。形狀魁偉。而懸鶉百結。襤褸不堪。後隨一人向之。索錢。喧呶不已。偉男子掉臂竟行。不答一語。其人忿甚。突前仆之於地。揮拳奮下。男子一任其毆。殊無痛楚。吳生異之。趨前勸止。其人曰。彼欠余三月飯金。一錢不與。今必不相捨。生問值幾何。曰前後共計十金。生探囊代爲之償。其人乃釋之而去。男子起拱手致謝。生令其隨至寓齋。詰其姓名。男子曰。余柳南也。從師學劍十年。今始出山耳。生曰。此外何能。曰無能。祇善噉飯耳。生曰。今將安歸。曰四海飄零。一身潦倒。將安歸。生曰。然則從余南耳。曰願甚。生遂攜之歸吳。與之談元言奧理。肆出不窮。遂爲談友。暇則爲生經理家事。條

理井井。因是生一切皆委之。不數年。粟溢於倉。錢朽於貫。富甲一方。生頗德之。有葉孝廉者。生同研友也。家甚豪富。是冬。公車北上。來辭別生。柳謂葉曰。君此行必登第。但須假力他人。因出袖中文一冊。曰。熟此則玉堂可致也。葉頗不甚信。生因力贊其能。葉至都應試。數題一一脗合。主司擊節歎賞。竟置第一。殿試策又適符。居二甲。遂入詞林。歸後報柳南以萬金。曰。此利也。飄然辭生而出。追之已杳。生歎愕久之。越數年。生方從友人家晚飲歸。解衣欲睡。忽聞搗門聲甚厲。呼僕啓門。則人喘馬嘶。喧闐滿室。生驚出視之。則登堂指揮者。柳南也。衣冠華煥。非復昔時。旋見有自輿中出者。皆十七八女子也。生喜駭交并。逕前執柳南手曰。子去幾令人悶死。何遂翩然遠逝耶。柳笑曰。別後浪游楚蜀。思所以報君者。尙未至。因念生人之樂。必當擁名姬。居大廈。裘馬盈門。綺羅接席。爲溫柔鄉。生色。僕故爲加意訪求。留心選豔。以充下陳。實

後房。茲羣鬟俱在。請君觀之。以爲何如。乃一一呼之來前。指謂生曰。此蜀中二嬌。一字翠翹。最工刺繡。一字墨倩。雅善鼓琴。又西顧曰。此西方美人也。能作掌上舞。又曳最稚一娃曰。此襄城之女少陵。可與君旗鼓相當。生目已成障。心復搖旌。茫然不知所對。但笑曰。豈其在夢中耶。翌日。柳生盡出其囊中金。鳩工購材。土木大興。未幾月。已告落成。第宅連綿。雄於一郡。令生移居其中。生見曲廊深院。舞榭歌臺。備極人工之巧。簫管之聲。出於牆外。入房則椒壁芙蓉。芬芳遠透。俄而紅粉如雲。爭憐獻媚。微睨之。皆國色也。生自此享用瑤於王侯。其年適嘗大比。柳南偕生至都。出一冊文。令生揣摩。旣入場。題盡與合。發解南開。柳南爲徧徵戚友。及郡之有夙望者。演劇譏賀。賓客不期而至者數百人。道上之冠蓋相望。座間之中裘相接。酒酣。柳南抗聲起曰。君輩亦知吳解元爲何如人乎。僕挾劍術游人間。迄少所遇。竊以宇宙之廣。豈無

一人知我者。故落拓自放。冀有所得。吳解元遇於衢市。初不相知。遽肯解囊拯急。攜我偕歸。委以諸事。真我鮑叔哉。今解元名立利全。此中得以稍慊。顧僕豈淮陰望報者流哉。亦使後世知我輩中未嘗無人耳。言訖。聳身向檐。倏忽已逝。衆始知柳南爲非常人。

遜齋詞言

老
僧



老僧

衛文莊保定人。少讀書。甚穎敏。三年而諸經畢誦。父師俱以遠到期之。及習帖括。竟不能成文。苦相督責。則憤然曰。此等惡劣文字。幾如犬吠驢鳴。乃強使人把卷吟哦。執筆摹仿。寧死不能學也。師奇其言。然以其資異。不忍遽令輟業。委曲勸諭而已。翌日。衛忽逃去。不知所之。十年始歸。體貌瑰偉。丰神清拔。與人談。悉元妙之理。間及劍術。父母詰其向在何地。秘不肯言。自此遂以拳棒家自名。師之者戶外屢滿。一日。忽有少林僧來訪。極道企慕。言次。因問衛婚未。衛曰。遠出甫歸。無暇及此也。僧曰。適自秦中來。西安有一奇女子。曰仇慕娘。國色也。精曉各技。秦中無與之敵者。特標於門曰。有角藝而勝者。願奉箕帚。小僧頗欲得之。恐不能勝。願與君偕行。不勝則君繼之。未知姻緣簿

爲誰如意珠也。衛笑諾之。遂策蹇俱去。既抵西安。往詣仇舍。則崇閣廣廈。宛然世家。及見慕娘。高髻淡妝。姿容絕代。一婢捧劍而侍。請衛更衣。衛揖。僧先窄袖蒙首。躡屣而前。女見僧至。雙頰微酡。頗有慍色。翩然入內。久之始出。謂僧曰。來。僧奮拳揉進。女稍偏以避之。僧左女右。僧右女左。騰挪數四。女起一足。適中僧股。顛去尺有咫。呻吟倒地。已不能行。衛趨視之。骨已折矣。女笑曰。秃奴破戒。宜受此苦。因請衛角。衛遽飛劍及之。女笑不言。從容向侍婢取劍相迎。縱橫揮霍。頃之。但見寒光萬道。莫辨女影。衛方欲盡技敵之。女忽收劍曰。君勝我矣。女父卽出款衛。留宿齋中。以踐姻約。而送僧於逆旅。衛合卺後。伉儷甚篤。閒時衛談及僧曰。此衲子拳法甚高。已臻少林絕技。所以遇卿。乃創之甚也。女曰。妾師所教。惟有一法。可以破彼。曩妾入內易履。苟一著足。無不立殞。因視履內。瑩然三寸許七首也。後衛從軍蜀中。積功至太守。分治重

慶攜眷赴任。偶與慕娘並游錦雞坊。登亭眺覽。忽見少林僧同一老和尚至。老僧碧眼方瞳。眉長寸許。手爪若麻姑。謂慕娘曰。婢子無知。擅傷我弟。今日汝命恐不得逃。瞥吐雙丸。直射慕娘。慕娘凜然寒噤。但覺周身冷若冰雪。須臾。老僧曳杖竟去。衛與慕娘若喪魂魄。匆匆乘輿歸衙。迨夜卸妝。則鬢髮盡落。若刀薙然。及解羅襦。則紅抹胸劃然中斷。方知老僧劍俠高手也。因與衛向空頂禮。始得無恙。後衛細訪顛末。方知老僧固與其師同門也。遊窟闢言

相士



續劍俠傳 卷四 相士

相士

湘陵有陳生六奇者。以勇力自恃。武斷鄉曲。人都畏惡之。同里秦星槎家有諸葛報時爐。盤龍刻鳳。式製甚工細。上有十二竅。底有一小洞。是炷香者竅。按十二時應時香出。秦氏以祖父相傳。珍若寶玉大弓。不輕易示人。一日。因讌佳客。特出以誇耀於筵。經手澤撫摩處。光堪鑒髮。咸嘖嘖歎爲希世珍。時陳亦在座。興攘奪之念。欲借歸家中。以供一日清玩。秦笑曰。鄙人性素慷慨。凡物皆可與共。所不可共者。惟此物與山妻耳。陳不懌而去。思有以報之。而未得間。忽傳賊氛東竄。不日將犯境矣。陳率里中無賴人自成一隊。一切槍礮器械悉自置。請於官。願備城守。邑中官白面書生也。事起倉猝。罔知所措。得陳以爲足恃。發帑金以作賞項。諸無賴悉踴躍。賊游騎之至城下者殲之。

益以爲功。顧餉用未集。陳乃倡言。此時正當紳富括資餉士。竭力報國之秋也。親詣秦家。索萬金犒軍。秦大驚曰。余所存者。僅田屋。今悉在城外。家所藏不及千金。願盡出以餉壯士。陳不可。往復再三。陳曰。秦家藏有諸葛爐。苟以饋余。其事當已。且余爲斯城之民。披堅執銳。衝鋒陷鎬。所保全者多矣。卽區區者。畀余亦何不可之有。秦氏懼禍。不得已納諸陳。無何。大營遣援兵至。賊退解嚴。邑令以全城功擢升知府。而陳亦得五品議敘。居然列於搢紳矣。秦自失爐後。鬱鬱不歡。漸患心疾。居常喃喃。如與人對語。或獨坐書室。吁嘆竟夕。一日扶杖閒立門外。見相士過。呼入與語。相士清髯玉貌。神體疎秀。一見秦卽曰。君頗不憂衣食。而面有戚色。何也。豈非有不得志事耶。秦知其非凡士。乃告以故。相士曰。我能爲君謀。當令返故物。不索相值。竟出。秦命僕追之。已杳矣。相士方擇陳旁舍設小肆。大書天下風鑑第一家。陳適與友行市中。

歸見之。大異。因就相焉。遽據上座。傲睨自若。相士諦視久之。感額曰。君有大晦。不出今日。若以諸葛廬施我。俾歸故主。爲君解釋。冤結或可免。陳忿作色。顧謂相士曰。汝爲秦氏作說客耶。敢妄言唐突我。勿悔勿悔。推案遽出。衆爲危之。相士曰。彼三尺七首。已加頸上。焉能害我。頃陳遣其黨噪而至。將加鞭扑窘辱之。則相者已不知所往。是夜陳睡方醒。聞鐵聲鏗然甚厲。蹶然驚起。見條有一物。穿窗而過。皎若霜雪。與月光爭激射。直達陳寢。陳懼。急以被蒙首。物過處痛徹心髓。呼僮燭之。見小刀徑尺許。入木五寸。頂血淋漓。沾濡牀褥。而髮去其半。顧無一髮留於枕畔者。陳力拔其刀出。就火諦視。覺一片寒光。冷侵肌骨。刀形製極精巧。柄上鐫相者名。陳悚然曰。我固疑此人也。不敢復寢。達旦盥漱甫畢。見硯旁有一函甚高。啓之。乃昨夕所失之髮也。有字一行云。爐不歸。今夜取汝首矣。陳愈懼。立攜爐親送之秦書室中而歸。自是陳

威儀稍息。避窟謂言

飛劍將軍



飛劍將軍

吳思演。江西之南豐縣人。富而任俠。武藝絕羣。尤精劍術。得異人傳授。一日。有雲游道士。造門請見。吳知其非凡。卽拜之爲師。道士盡其所長授之。惟不及劍。謂之曰。吾生平絕技。悉授予人。無所隱也。顧能精於其道者。天下惟三人而已。君其一也。吾觀子神骨清澈。頗有道氣。法當尸解。雖工劍術。亦未足爲多。乃更授以吐納導引之術。曰。此內丹也。煉此雖金石水火。多無所畏。今天下亂離。盜賊蠡起。子當爲國家宣力。十二年之後。見我於無錫惠山之麓。其謹誌之勿忘。吳後游楚中。一日。有老翁疏髯道服。貌甚清古。攜一少女造門。請比劍術。吳延之入。視其女年僅十四五歲。髮尙垂髻。容豔若桃李。而神清如冰雪。異焉。問姓名。不告。曰。第比劍耳。奚瑣屑問爲。相約於黃鶴樓前。訂

期而去。及期而往。女已先在。捧劍而立。繡裳寬袖。非劍妝也。吳請更衣。曰。不必。語次。白光一閃。劍已及頂。吳急出劍敵之。一劍又起。飛舞空際。白光旋繞不定。但聞颯沓之聲。驟如風雨。女身隱躍光中。不能正視。鋒芒駭疾。不離吳之左右上下也。吳愈退。劍愈迫。時觀者千人。咸木立神悚。無敢出一語者。吳大懼。奮身一躍。出入九步外。曰。神技也。止。無過偏。女乃止。視吳微笑曰。君能敵我。亦大不易。無怪師云。爲門牆高足弟子也。吳異其言。詳詰來蹤。則授女術者。卽吳之師也。常道吳能。故女來一較耳。吳因問女劍術之外。尙有何能。女不答。竟去。楚中大帥聞吳名。招致幕下。令在行伍立功。每殺賊。吳必以身先。百步外取賊目首級。百無一失。賊中稱之爲飛劍將軍。吳有神術。能於槍礮矛戟叢中。奮身獨進。而絕無所傷。偶有一鉛丸。墮吳營帳。吳所憑之。几粉碎。而吳危坐自若。人皆驚以爲神。後隸張帥麾下。大營兵潰。張帥殉國難。

吳隨衆軍退至無錫。駐營城外。方擬出戰。聞賊猝至。衆皆遁去。惟吳獨存。以爲賊距尙遠。必不能來。時吳服五品服。花翎晶頂。據鞍徐行。縱覽惠泉山色。賊之游騎已至。吳若不覺。一賊從後揮刀斫吳。殺之馬下。越數日。吳之親丁來收其尸。納之棺中。載至蘇州。鄉間喚人。昇於塚上。舉之覺甚輕。啓而視之。已無所有。惟常日所用一劍而已。人以爲尸解云。此係豫章程君。親在營中。目擊其事。謂非虛語。程君常與吳周旋。言其絕無異人處。惟夜多不寐。起必以寅初。口向東方。噓吸舞蹈。約一時之久。雖盛寒暑不輟也。遊窟謠言

張青奴



張青奴

會稽馮生。字少文。有豪俠氣。以事至都。偶過市上。見人叢中一媪攜一少女。哭甚哀。旁一少年。促女登輿。觀者如堵。皆曰可憐。馮詢其故。知女父爲縣令。以虧帑灑職。上司籍其家產。數未盈。責令抵之。其父以憂憤卒。今將鬻此女爲喪葬費。母女分離。是以悲耳。馮惻然。立出百金贈媪。令人鬻價返少年。少年曰。已有成議。不可改矣。馮婉勸曰。彼鬻愛女。良非得已。徒以父死無殮。故勉強從事。今彼已具金返君。君亦宜少憐惜。少年厲聲曰。汝何人。敢與聞事。如必欲已。非返我千金不可。馮怒其無禮。遽捽其髮。少年亦怒。遂成毆鬪。少年力勇。馮漸不支。時觀者愈衆。忽有一童子面如冠玉。髮髻雙丫。從人叢中拉少年頸。叱曰。清平世界。強買良家女。將謂三尺法不足畏耶。少年痛不可

忍。願反券罷議。其黨十餘人。紛紛俱上。童一手格之。如摧枯朽。衆懼披靡。乃令少年反突收金。交易而退。旁觀皆咋舌。或言少年爲某將軍之子某者。此仇恐必報。姬女去後。童謂馮曰。君高義誠足千古。然旅居於此。恐禍及。不如速歸。馮從其言。星夜束裝返會稽。翌日。去都城百餘里。行至三家堡。日將晡。有暴客瞰其行李沉重。乃聚衆於堡。待馮過而要劫之。馮大驚。策騎疾行。馬偶失蹄。顛馮於地。比上鞍欲走。而追者已及。馮益驚。正倉皇際。忽一美女騎獨角獸疾飛而至。盜欺幼稚。略無少懼。女鼻中吐白光一縷。橫若匹練。飛斬盜魁一人。餘皆驚遁。白光追之。良久始返。女自言曰。賊么麼雖不卽死。然四肢已不可用。馮驚定。揖問女曰。君尙識我否。細視之。卽丫髻童也。馮咄咄稱怪不已。因問何以至此相救。且有此神技。女曰。實告君。我劍仙張青奴也。向從妙手空空兒學技。見玉面郎君美。偶動凡念。師怒。責罰塵世。立功德三十

萬。今將滿數。曩見君義。故來相救。以後如有所須。向西北呼青奴者三。妾當卽至。我去矣。一瞥而逝。聲影寂然。馮目瞪良久。始覓歸途。至家。會秋旱無收。城鄉大饑。馮倡衆議賑。郡有土豪。富而吝。不輸一斗粟。馮憤然曰。守錢奴與則與。不與豈能敗乃公事。於是盡鬻其產。以助賑捐。得其半。已竭力變賣遺產。亦得其半。然猶有許多待哺者。計惟再得五千金。則惠始徧。而家業已空。款又甚鉅。輾轉無以爲計。乃向西北三呼青奴。室中紅光一瞬。奴錦帶纏頭。輕妝豔服。從庭中飛至。馮大喜。伏地拜求。告以所謀。奴曰。何不再向富室捐去。馮曰。都已捐徧。惟某豪梗命。不助一文。遂使郡中多尤而效之者。故尙少三千也。奴曰。彼如此可惡。我爲若去取來。遂縱身而逝。俄聞庭中擲金聲甚厲。凡數作。馮燃火燭之。青奴已至。笑曰。幸不辱命。已取得五六千金。儘穀君分發矣。彼始不肯。我以飛劍盡截其髮。謂若少吝。當頃刻使汝作斷頭將軍。

彼方懼。故任我所取。馮曰。何不用竊取計。致使聲張。奴曰。英雄涉世。豈肯作曖昧事者。令彼知之。正所以懲一儆百也。馮歎服。跪謝地下。及起。女已不見。

繞愁集

續劍俠傳 卷四 張青奴

